

祥符县志卷之五

人物

古来称人物者，曰天下，曰一代。今徒以地灵人杰为词，小之乎言人物矣。大梁自公子无忌而后，名贤踵出，或以道学，或以勋业，或以文章，考而著之，亦以见一邑有关于天下一代，可垂于万世也。宁谨表里旌门，以云典型在兹哉，作人物志。

战国

公子无忌，魏昭王少子，安釐王异母弟，封信陵君。仁而下士，食客三千人。当是时，诸侯以公子贤而多客，不敢加兵于魏。秦昭王已破赵长平军，进兵围邯郸，公子姊平原君夫人，数遣魏王及公子书请救。魏王畏秦，使晋鄙将兵救赵，令留军壁邲。无忌用侯生计，遂破秦军，救邯郸，因留于赵。秦因公子在赵，日夜东伐魏，公子乃归，率五国之兵，逐秦至函谷关不敢出。秦王患之，行间于釐王，王疑，使人代无忌将，无忌自知以毁废，乃谢病归，与宾客为长夜饮，四岁卒。

侯嬴，大梁人。年七十，家贫，为夷门监者。魏公子无忌欲厚遗之，不肯受。公子乃置酒大会宾客，从车骑，虚左，自迎侯嬴。侯嬴摄敝衣冠，直上载不让，欲以观公子。公子颜色愈和。既至，引嬴上坐，众宾皆惊。及秦围邯郸急，魏王不肯发，公子欲驰赴秦军与赵俱亡。过侯嬴，嬴授计公子窃晋鄙兵符救赵。谓公子曰：臣老矣，不能从。约公子行至晋鄙军之日，北乡以自刭。及公子至军，嬴果自刭。

朱亥，大梁人。贤而隐于屠，侯嬴荐之魏公子无忌，公子无忌枉车骑过之，亥不复谢。及公子晋鄙兵符救邯郸，嬴使朱亥从，椎杀晋鄙，公子遂将晋鄙军破秦救赵。公子使亥奉壁谢秦，秦王怒置之虎圈，亥发冲冠，瞋目视虎，虎不敢动，秦遂以礼遣之。

唐雎，魏人。齐楚攻魏，魏人求救于秦，救兵不出。雎年九十馀，西说秦王曰：魏万乘之国也，称东藩于秦，以秦之强，足以为与也。今齐楚之兵，已合魏郊，大王不救，魏急且割地而约齐，楚王尚何救焉？是亡一藩国，而以强资二敌也。秦王悟，遂发兵赴魏，齐楚闻之，引兵去。

朱仓，魏人。初，惠施为齐、魏交^①，令太子鸣往质于齐。王欲见之，仓谓王曰：何不称病？臣请说婴儿。曰：魏王之年长矣，今有疾。公不如归太子以德之。不然，公子在楚，楚将内而立之，是齐抱空质而行不义也。婴儿许之。

张仪，魏人。学纵横之术，游说诸侯无所遇。后入秦，秦以为客卿，因使说魏

^①据刘向《战国策》为：惠施为韩、魏交。

王，曰：秦之遇魏甚厚，魏不可无礼于秦。魏于是尽入上郡十五县以谢仪。因留相魏，欲令魏先事秦，以倡诸侯，襄王不听。襄王卒，哀王立，仪复说哀王，而请成于秦，从约遂解，又说楚、韩、齐、燕，皆许之。仪自燕归报，未至咸阳而秦惠王卒。子武王素不说仪，故仪乃乞归，游梁十岁而卒。

秦

陈余，大梁人。好儒术，初与张耳为刎颈交。及武臣立为赵王，余为大将军，耳为丞相，后有隙，解印绶与耳，独与麾下数百人之河上、泽中渔猎。及项羽王耳，而以南皮旁三县封余，余怒以兵袭耳，尽收赵地，立为代王。张耳之破井陘，余死泚水上。

汉

张耳，大梁人。少为魏公子无忌客，官为外黄令。秦灭魏，购耳千金。耳与同邑陈余变名姓为陈监门，闻陈涉起，二人往从之。涉以为左右校尉，定赵地，立武臣为赵王，后与余有隙。项羽入关，立耳为常山王，余以兵袭耳，耳败走归汉，汉遣耳与韩信击破赵井陘，杀陈余，追杀赵王歇，遂立耳为赵王。卒谥曰景。子敖嗣尚高帝鲁元公至^①。

栾布，梁人。彭越微时，尝与布游。及越为梁王，请布为大夫。越被诛，诏有收视者辄捕之。时布使于齐，比还，奏事，越头下，祠而哭之。高帝怒欲烹布，布曰：愿乞一言而死。帝曰：何言？布曰：方上之困彭城，败荥阳、成皋间，项王所以不能遂西，徒以彭王居梁地，与汉合从苦楚也。当是之时，彭王一顾，与楚则汉破，与汉则楚破。且垓下之会，微彭王，项氏不亡。天下已定，彭王剖符受封，亦欲传之万世。今汉一征兵于梁，彭王病不能行，而疑以为反，反形未见，以苛细诛之，臣恐功臣人人自危也。今彭王已死，臣生不如死，请就烹。帝释之，拜为都尉。吴楚反时，以功封郾侯。

申屠嘉，梁人。以材官蹶张，从高帝击项羽，为队率。击黥布军，为都尉。文帝封为关内侯，迁为御史大夫。张敖免相，嘉代为丞相。嘉为人廉直，门不受私谒。尝入朝，幸臣邓通居帝旁，有怠慢之礼，嘉奏事毕，因言曰：陛下爱幸群臣，则富贵之，至于朝廷之礼，不可以不肃。罢朝为檄，召通数以不敬之罪欲斩之，通顿首出血，嘉弗为礼，帝遣使持节召通，而谢丞相，方释去。孝景时复相，相二年卒，谥曰节侯。

梁孝王武，汉孝文皇帝次子，与景帝同母，母，窦太后。孝文帝凡四男子，长孝景皇帝，次武，次参，次胜。孝文帝即位二年，以武为代王，以参为太原王，以胜为

^①据《史记》中《张耳陈余列传》判断，应为：子敖嗣尚高帝鲁元公主。

梁王。后二岁，徙代王为淮阳王，十年梁王胜卒，明年徙淮阳王为梁王，梁王比年入朝。二十二年孝文帝崩，二十四年、二十五年复入朝。景帝尚未置太子，与梁王燕饮，从容言曰：千秋万岁后，传于王。王辞谢，迨七国反，梁王城守睢阳，使韩安国、张羽等为大将军，以拒吴楚。吴楚以梁为限，不敢过而西，与太尉亚夫等相拒。迨吴楚破，而梁所破杀虏略与汉中分，梁与汉最亲，有功，又为大国，居天下膏腴地四十餘城。孝王为窦太后少子，爱之，赏赐甚厚。于是孝王筑东苑三百餘里，广睢阳城七十里。大治宫室，为复道，自宫连属于平台三十餘里，得赐天子旌旗，出从千乘万骑，出称跸，入言警，拟于天子。招延四方豪杰，齐人羊胜、公孙诡、邹阳之属皆至。梁多作兵器，府库金钱百巨万，珠玉宝器多于京师。孝王入朝，景帝使使持节乘輿，驷马迎梁王于阙下。既朝，因留，以太后亲故。王入则侍景帝同辇，出则同车游猎。梁侍中谒者皆得引籍出入天子殿门，上既废栗太子，窦太后心欲以孝王为嗣。大臣袁盎等有所关说于景帝，太后议格，梁孝王乃辞归国。怨袁盎及议臣，阴使人刺杀袁盎及他议臣。景帝意梁王，逐贼，果梁使之。覆按梁，公孙诡、羊胜皆自杀。梁王恐，因长公主谢罪太后，乃得释。梁王伏斧质阙下，谢罪。太后、景帝大喜，相泣，复如故。三十五年，复朝。归国，忽忽不乐，六月病热，卒。

丁宽，字子襄，梁人。初，梁项生从田何受《易》，时宽为项生从者，读《易》精敏，材过项生，遂事何。学成东归，何谓门人曰：《易》以东矣。宽至洛阳，复从周王孙受古义，号《周氏传》。作《易说》三万言，宽授同郡碭田王孙。王孙授施雠、孟喜、梁丘贺。繇是《易》有施、孟、梁丘之学。

戴德，字延君。弟圣，字次君，梁人。受礼于后仓，德号大戴，为信都太傅。圣号小戴，以博士论石渠，至九江太守。由是《礼》有大、小戴氏之学。大戴授琅邪徐良、旃卿，为博士、州牧、郡守，家世传业。小戴授梁人桥仁、杨荣。仁为大鸿胪，家世传业，荣为琅邪太守。由是大戴有徐氏，小戴有桥、杨氏之学。

郑兴，字少赣，开封人。少学《公羊春秋》，晚善《左氏传》，学者皆师之。刘歆美兴才，使撰条例、章句、训诂，及校《三统历》。更始立兴为丞相、长史令，后归隗嚣。建武中征为大中大夫，三月晦，日食，兴上疏极陈时政之弊，多见采纳，以不善谏不得任。从吴汉击公孙述，述死，留屯成都。因侍御史论奏，左迁莲勺令，寻以事免，不复仕。客阌乡，世言左氏者多祖兴，连辟不就，卒于家，子众，能传父学。

郑众，字仲师。年十二，从父受《左氏春秋》，精力于学，明《三统历》。作《春秋难计条例》，兼通《易》《诗》，知名于世。建武中，皇帝太子遣使往聘，辞不赴。永平中，以明经举为给事中。时匈奴求和，显宗遣众持节以往。众至，虏胁之，不屈，遂发使随众还京师。后坐忤旨系狱，会赦免。未几，起为军司马，使，累官至大司农。奉诏作《春秋册》十九篇，卒于官。

边韶，字孝先，浚仪人。以文学知名，教授数百人。尝昼日假卧，弟子私嘲之

曰：边孝先，腹便便，懒读书，但欲眠。韶潜闻之，应声对曰：边为姓，孝为字，腹便便，《五经》笥。但欲眠，思经事。寐与周公通梦，静与孔子同意。师而可嘲，出何典记？嘲者大惭。桓帝时征拜大中大夫，累官尚书令。

郑太，字公业，开封人，少有才略。灵帝末，举孝廉，累迁侍御史。大将军何进将诛阉宦，欲召并州牧董卓为助，太谏不听，乃弃官去。及卓作乱，太与荀攸、何颙共谋诛之。事泄，太走归袁术。术以为扬州刺史，未至，官道卒。

边让，字文礼，浚仪人。少辩博，能属文。作《章华赋》，丽而正。议郎蔡邕荐于将军何进，谓让可大用，屡迁九江太守。初平中，去官还家。恃才气，不屈曹操，多轻侮之言，卒被害。

郑浑，字文公，太之弟。汉末为下蔡长、召陵令。时民习剽轻，不念产殖，其生子率以不举。浑课使耕桑，重去子之法。民渐丰给，所生男女率以郑为字。入魏，累官魏郡太守，有治迹，明帝下诏称述，布告天下，迁将作大匠，卒，子崇官至郎中。

魏

陈思王植，字子建，太祖子，文帝同母弟。十岁余，诵读《诗》《论》及辞赋数十万言，善属文。邺郡铜雀台新成，太祖召诸子登台，使各为赋。植援笔立就，太祖甚异之。建安十六年，封平原侯，寻徙封临淄。植既以才见异，而丁仪、丁廙、杨修为之羽仪。太祖狐疑，几为太子者数矣。植任性纵饮，不自雕励。文帝御之以术，矫情自饰，宫人左右并为之说，遂定为嗣。文帝即位，命诸侯并就国。黄初二年，贬植为安乡侯，改封鄄城。二年立为鄄城王^①，四年徙封雍丘。明帝太和元年改封浚仪，二年复还雍丘，三年徙东阿，六年加封陈王。薨，年四十一，谥曰思。

晋

郑冲，字文和。清恬宽恕。博通经史，初仕魏，为陈留太守，累迁太保，封寿光侯。时定仪礼律令，多主于冲。入晋为太傅，进爵为寿光公，致仕。卒赠太保，谥曰成。所著有《论语集解》。

郑袤，字林叔。太之子，少孤，有识鉴。荀攸见之曰：郑公业为不亡矣。仕魏，累官济阴太守。表孝弟，敬贤能，兴立庠序，开诱后进。调补大将军从事中郎，拜散骑常侍。迁广平太守，以德化为先，郡中爱之。擢光禄大夫，封密陵伯。武帝即位，进爵为侯。恳辞乃就第，拜仪同三司。卒谥曰元。子六：长默，嗣次、质、舒、诩、称予，位并列卿。

郑默，字思元。仕魏，为秘书郎，累官司徒左长史。入晋为中庶子，出为东郡太守。值岁荒饥，默辄开仓赈给，乃舍都亭，自表待罪。朝廷褒嘉之，颁告天下。官至

^①据《三国志·魏书·任城陈萧王传》中载，三年，立为鄄城王，邑二千五百户。

光禄勋，卒谥曰成。子二，曰球，曰豫。球以功封平寿公，豫官至尚书。

南北朝

郑鲜之，字道子。浑之玄孙，仕晋，累迁御史中丞。入宋，迁太常、都官尚书。武帝北征，以从征功，封龙阳县子，后为尚书仆射。卒，有文集行于世。

郑羲，字幼麟，浑之八世孙。仕元魏为中书博士。延兴初，阳武民田智度妖惑动众，扰乱京索。诏以羲为河南民望，遣往慰谕。羲至，宣示祸福，旬日之间，众皆解散。以功赐爵平昌男，累拜安东将军。卒谥文灵。子二，懿、道昭。

郑懿，字景伯。闲雅有政事才，为孝文所重，累官给事黄门侍郎、司徒左长史，后为齐州刺史。好劝课，善断狱，百姓思之。卒，赠兖州刺史，谥曰穆。

郑道昭，字僖伯。少好学，综览群言。元魏文帝时累官国子祭酒、司州都督。道昭连上疏请兴学校，不报。历光、青二州刺史，复入为秘书监。卒谥文恭。道昭好为诗赋，其在二州，宽厚不任刑威，为吏民所爱。子述祖。

郑述祖，字恭文。少聪敏，好属文。仕齐，历太子少保、左光禄大夫、仪同三司、兖州刺史。有惠政，境无盗贼，百姓歌之。疾笃谓人曰：吾老矣，富贵已足，以清白之名遗子孙，死复何恨。天统中卒，赠开府、中书监、北豫州刺史，谥平简。族子道邕。

郑道邕，字孝穆。幼谨厚，以清约自居。叔父四人并早卒，道邕抚训诸弟，有如同生。天统中累官岐州刺史，所部久遭乱，百姓散亡几尽。道邕勤抚绥，户口增至四万，以绩最征拜京兆尹。入周，除丞相府右长史，封金乡县男。孝闵践阼，加骠骑大将军、开封仪同三司，进爵为子。入为少司空，卒。赠郑、梁、北豫三州刺史，谥曰贞。子诩嗣，累官开封仪同大将军，邵州刺史。诩弟译事隋文帝，有翊戴功，开皇初，追赠道邕大将军，徐、兖等六州刺史，改谥曰文。

郑绍叔，字仲明，开封人。少孤而贫，以孝谨著名。弱冠仕梁，为安丰令，甚有声。武帝封东兴县侯，所得禄赐悉归兄室，无一私藏。累迁征虏、司州刺史，创立城隍，缮兵积谷，招纳流民，百姓安之。征为左卫将军，卒赠散骑常侍，谥曰忠。子贞嗣。

隋

郑译，字正义，道邕子。有学识，兼知钟律。初仕周，为内史上大夫，封沛国公。入隋以定策功，拜上柱国。尝奉诏撰定律令及《乐府声调》，凡八篇，奏之。上加美焉，迁岐州刺史。岁馀，复诏定乐于太常。卒谥曰达，追封莘公。

唐

郑元琚，字德芳，译之子。仕隋，文成郡守。入唐，授大常卿。时突厥处罗可汗

寇汾晋，诏元琇往谕之。会处罗暴病死，其下疑元琇置毒，遂囚之，留数年。及帝许可汗婚，始得归，拜鸿胪卿。后突厥复寇太原，诏复遣元琇持节往。凡五使绝域，随语折让，无所屈。及还，太宗赐书褒之。卒赠幽州刺史，谥曰简。

格希元，浚仪人。父处仁，仕隋为刺史。与同郡王孝逸、繁师元^①、靖君亮、郑祖威、郑师善、李行简、卢协皆有名，称为“陈留八俊”。希元为洛州司法参军，同章怀太子注范晔《后汉书》。

吴兢，浚仪人。贯知经史，方重寡谐，以荐克^②史馆修国史。玄宗时，累官谏议大夫，封长垣县男，官至恒王傅。初，兢与刘子玄撰《武后实录》，叙张昌宗诱张说诬证魏元忠事，赖宋璟激劝切直元忠，乃免。及说为相，屡靳改之。兢曰：狗公之请，何为实录？卒不改。世人比之董狐。

刘昌，字公明，开封人。喜骑射。天宝末，从张介然讨安禄山，授宋州牙门将，擢左厢兵马使。时李希烈陷襄邑，昌守宁陵，希烈众五万攻之，相拒凡四十餘日，贼败乃解去。贞元中，累迁泾源节度使，封南川郡王。在边最久，所至率士垦田，而军有美食，边障安宁。卒赠司空。

朱忠亮，字仁辅，浚仪人。初为薛嵩裨将，以功擢太子宾客。朱泚之乱，率麾下四十骑至奉天，封东阳郡王。宪宗立，加御史大夫，寻授泾原四镇节度使。泾俗多卖子，忠亮捐资赎还者前后数百。吏白耄卒不任战当罢。亮曰：老马且不忍弃，况战士乎？士皆感泣。筑潘原城有劳，改封丹阳。卒赠尚书右仆射，谥曰灵。

郑权，开封人。初擢进士第，佐泾原节度使刘昌府。昌被病入朝，度其军必乱。以权宽厚容众，檄主后务。昌去，军果乱。权明谕祸福，杀首乱者，一军畏伏。拜行军司马，累迁金吾卫大将军。穆宗立，以左散骑常侍持节使回鹘权，持议明壮，虜礼异之。使还，三迁工部尚书。

五代

寇彦卿，字俊臣，身長八尺，隆准方面，声如洪钟。工骑射，好书史。梁太祖曰：寇彦卿实天为我生之，赐所乘马一匹。太祖略凤翔，卿为排阵使，乘马驰突阵前。太祖曰：真神将也。及即位，拜感化军节度使。

宋

石守信，浚仪人。仕周为洪州防御使，入宋改归德军节度。时李筠叛，守信讨平之，加同平章事，徙镇鄆州兼亲军马步都指挥使。乾德初，称病解兵归第。太平兴国中，累进检校太师，封卫国公。卒赠尚书令，封威武郡王，谥忠烈。子保兴、保吉。

郭贄，开封人。乾德中进士，累官参知政事。时曹彬为弥德超所谮，贄力辩其

①因繁师玄之玄避玄讳，改为元。

②原刻本疑有讹误，此处应为“兢”。

诬。尝对太宗曰：臣受遇不次，惟以愚直报上。太宗曰：愚直何益？贇曰：犹胜奸邪。太宗称善。官至礼部尚书。

和峴，浚仪人，晋宰相凝之子。仕晋历官著作郎，入宋为太常博士。善音乐、郊庙之礼，多所更定。太祖以雅乐声高，命峴讲求均节之，八音和畅。上悦，拜司勋员外郎。太宗即位，擢京东转运使。

薛居正，字子平，浚仪人，后唐时举进士。仕周为刑部侍郎，入宋累迁枢密直学士。初平湖湘，以居正知朗州。会亡卒啸聚为盗，监使疑城中僧千余人皆其党，欲尽诛之。居正计擒贼首汪端，诘之，僧皆不与，赖以全活。官至门下侍郎、平章事，进司空。卒赠太尉、中书令，谥文惠。子惟吉仕，至佐领军卫大将军。

王侁，字秘叔，浚仪人。父朴，周枢密使，侁以荫任太仆寺丞，入宋为阁门祇候。太平兴国中，使灵州、通远军还。言王师所留牙兵与边人交结，颇桀黠难制。帝因遣侁调内郡卒往代之。戍者闻代，多不愿还。侁斩以徇，众惧乃还。侁数往来西边，辄奏便宜事，帝皆纳之。官至均州团练使。弟僕，阁门祇候；偃，太常博士。

刘廷翰，浚仪人。仕周为殿前指挥使，宋初，与平上党、维扬，迁铁骑都指挥使，领廉州刺史。太宗时，命廷翰率兵屯真定。契丹南侵，廷翰大破之，以功领大同军节度，后改大名尹、天雄军节度。卒赠侍中。

周审玉，开封人。父勋，隰州团练使，审玉以荫补殿直。雍熙中，契丹入寇。审玉为监军，尝与敌战，而先锋刘绪陷贼，审玉跃马趣击，拔绪而还，以勇敢闻。淳化中，知贝州。有戍卒谋逆，审玉悉擒诛之。累迁千牛卫大将军。

卢斌，开封人。初以笔札事晋邸，太宗即位，补殿直。出为华州巡检，追杀贼刘渥等于耀州，以劳改供奉官，寻为梓、遂十二州都巡检。居川陕六年，以孤军御寇，累立奇功，召拜检校左仆射。

郭载，字咸熙，以荫补右班殿直。端拱初，知秦州兼缘边都巡检使。先是，巡边者多领兵骑以示威，戍人苦之。载至悉减去，众皆感悦。改知成都府，受诏讨李顺，寇平而卒，蜀人惜之。

常思德，开封人。仕周为神卫都虞候，宋端拱初，备溪州刺史。李顺作乱，命思德讨之，掩杀贼三千余人，与尹元、裴庄等合师并进，尽歼其党。川、陕赖以安靖，以功授汝州刺史，累迁左神武大将军。

尹继伦，浚仪人。初，补殿直，权领虎捷指挥，迁缘边都巡检使。端拱中，威武军乏粮，帝遣李继隆发兵护送輜重数千乘。时契丹将于越将击之，继伦适领兵巡檄路与寇遇。夜率众以短兵蹙其后，至徐河间，击杀其将，众遂溃，即引去，自是不敢窥边，每闻继伦名则不知所措。以功领长州刺史，后官至灵、庆兵马副都署。

上官正，字常清，开封人，淳化中为剑门都监。李顺作乱，遣其党攻剑门，正奋励士气迎击，大破之，斩馘殆尽，迁剑州刺史，累官平州防御使致仕。子粲，仕至内殿崇班。

和嶸，字显仁，峴之弟。太平兴国初举进士，累迁光禄寺丞。先是，父凝尝取古今史传听讼断狱、辨雪冤枉等事，著为《疑狱集》，嶸因增益事类，分为三卷及所著文赋五十轴并上之。召试中书太子中允，累迁右正言。与王旦同判吏部铨、知制诰。卒。弟嶸、子琪俱大理评事。

许均，祥符人。以应募征辽东补武骑十将，累迁徽州团练使，寻出知代州。均有勇略，所至辄立战功。后卒。子怀德。

白守素，开封人。父廷训，博州刺史，守素以荫补东班承旨，累迁镇州钤辖。王继忠陷契丹，守素据桥，有矢数百，每发必中，敌不敢近，遂引去。居边岁久，契丹畏之，再迁南作坊使。及卒，帝甚惜之。

王显，字德明，开封人。太宗居藩，尝给事左右。及即位，累迁枢密使，加检校太师，出为山南东道节度，加镇、定、高阳关三路都部署。契丹入寇，显大破之，梟获名王贵将十五人，斩首二万级，再徙知天雄军。卒赠中书令，谥忠肃。子希逸，官至殿中丞直史馆。

刘谦，字汉宗，开封人。少补卫士，累迁环庆路总管兼知邠州。谦虽未学，而听断讼狱，区处皆当理。前守者多强市民物以饰厨传，谦独无所扰，邠人爱之。官至象州防御使，卒赠永兴军节度观察留后。

马知节，字子元，祥符人。父全义为龙捷左厢都校，领江州防御使知节，以荫补供奉官。年十八，监彰州兵，以严见惮如老将，累以战功迁至枢密副使。时王钦若为枢密使，知节薄其为人，每面诋之。后除彰德军留后，卒赠侍中，谥正惠。

李端懿，字元伯，镇国军节度使、駙马都尉，赠尚书兼中书令谥和文李遵勖之子，其母齐国献穆太长公主，太宗之女也。端懿笃学博闻，长而孝友。喜为诗，工书画，于阴阳、医术、星经、地理无所不通。历供备库使、洛苑使、新州刺史、康怀二州团练使，累迁镇潼军观察留后，知澶州。卒于官，赠感德军节度使兼侍中太常。

蔚昭敏，字仲明，祥符人。真宗时为供奉官，历定州刺史，为镇、定、高阳关三路先锋。契丹入寇，昭敏追至莫州东三十里，斩首万余级，俘获甚众，契丹委甲而去。累迁保静军节度，卒赠待中营。

石保兴，字光裔，初以荫补供奉官。真宗时累迁知威武军，夏人入寇，保兴发官帑钱数万缗分给战士，主者固执不可，保兴不从。及夏人退，驿置以闻，帝嘉之。已而拜棣州防御使，累改知澶州。

石保吉，字祐之，初以荫补天平军衙内都指挥使。尚延庆公主拜左卫将军，累迁武宁军节度、同平章事。真宗幸澶渊，命保吉与李继隆为驾前都排阵使，时辽人数万骤至城下，保吉不介马而驰当其锋，辽人遂退而请盟。帝喜称其功，保吉归功于继隆。继隆亦让之。帝曰：卿等协和，共致太平，朕复何忧。改镇安军节度，加检校太师。卒赠中书令，谥庄武。

王继英，祥符人。初真宗在藩邸，选为导吏。及即位，领恩州刺史兼掌阁门使，

累迁枢密使，加特进、检校太傅。卒年六十有一，上临哭之，赐金营葬，赠太尉、侍中，谥恭懿。

史方，字正臣，开封人。初补三班奉职，累官阁门祗候。天禧中，澧州民诉下溪蛮侵其土地，帝遣方往视。方复地四百餘里，得所掠五百餘人，又捕降其党李顺同等甚众，累迁右侍禁。天禧中，蛮复作乱，方讨平之。迁内殿承旨，官至秦凤路钤辖。

李继宣，浚仪人。初为贝州监军。咸平中，以功累迁西上阁门使，领康州刺史。时契丹入寇，继宣率兵大战，敌败走。继宣逐之，马中矢毙，凡三易骑，进至牟山谷，大克之。诏书褒奖，加检校官，累迁至西京水南都巡检使。

张煦，字辅暘，开封人。雍熙中为殿前承旨，累以战功迁益州都监。夏人入寇，改邠宁环庆路钤辖兼巡检、安抚都监，率众深入贼中七百餘战，击杀甚众，拜西上阁门使，徙并代钤辖。以老求近郡，得知磁州。

许怀德，字师古，善骑射击刺。初为东西班殿侍，仁宗时为廊延路兵马钤辖。会居承平砦，夏人来寇，怀德以劲兵突围，破之，追至延州，斩首二百级，以功累迁保宁、进雄二节度使。卒，赠侍中，谥荣简。

张耆，字元弼，开封人。为人重密，有智数，真宗在东宫，尝命授《论语》《左氏春秋》。及即位，除供奉官，历定州刺史。契丹围望都，耆与诸将从间道往援，比至，城已陷。因与贼战，杀其梟将，耆亦身被数创而还。因请大举讨之，不报。景德中，累迁枢密使，封徐国公。以太子太师致仕，卒，赠侍中，谥荣僖。

丁度，字公雅，祥符人。真宗时为大理评事，迁翰林学士。尝上备边十策，帝嘉纳之。庆历中，拜端明殿学士，未几，擢枢密副使、参知政事转尚书左丞。卒，赠吏部尚书，谥文简。所著有《庆历兵录》《赡边录》《武经总要》各若干卷。

向敏中，字常之，开封人。举进士，为将作监丞，迁工部郎中，百餘日超擢右谏议大夫、同知枢密院事，累官至仆射、昭文馆大学士。卒，赠太尉、中书令。谥文简，五子、诸婿并迁官亲校。敏中居大任三十年，时以重德目之，甚为人主所优礼，有文集十五卷。

马怀德，字德之，祥符人。初补三班奉职，仁宗时积官静难军观察留后，累立战功，斩获动以万数。尝为流矢中其颞，镞入骨，以弩弦系镞，发机而出之。

段少连，字希逸，开封人。举服勤词学，科授秘书省校书郎，累迁殿中侍御史，与孔道辅等伏阁言郭后不当废，少连坐赎，复两上疏辩：道辅无罪，及请复中宫位。号皆不报。历天章阁待制、知历州。元昊反，范仲淹荐少连堪任将帅，迁龙图阁学士、知泾州，改知渭州，命未至而卒。

范恪，字许国，开封人，骁勇善射。仁宗时以战功累迁永兴路副总管。恪有弓胜一石七斗，其箭镞如铍，名曰铍弓。尝会兵取蕉蒿砦归，恪独殿后，数千骑所袭，恪视服止有二铍，即为引满之势，贼遽却后。累迁永兴军路副都总管。卒，赠昭化军节

度使。

赵滋，字子深，开封人。父士隆，天圣中为邠宁环庆路都监，死于战。滋果敢任气，有知略。以韩琦荐累迁阁门祇候，出知雄州。时契丹遣大舟十餘入海口运盐，滋戒巡兵，舟至，辄捕杀其人，契丹惮之。仕至嘉州团练使。

刘兼济，字宝臣，祥符人，善骑射。仁宗时为襄州兵马监押。汉江暴涨，兼济解衣涉水，率众捍城，州赖以完。累迁廊延路兵马都监、知龙竿城。会夏人寇边，众号数万，兼济将兵千餘，大破于黑松林。属户明珠族叛，兼济又平之，历官至西上阁门使。

郭楨，字仲征，举进士，历刑部员外郎，同修起居注。康定初使契丹，厚礼之，与同猎，延楨射，楨一发中走兔，众皆愕视。还，擢龙图阁直学士、权知开封府。卒。楨性和易，文思敏赡，尤刻意于赋。聚古书画，不计其资购求之。

张希一，字简翁，耆之子。仁宗时以父荫拜引进使，累迁真定路总管。尝使辽，辽人诘以雄州不当禁渔界河及役白沟两属民。希一曰：界河之禁，起于大国统和年，今文移尚存。白沟本输中国田租，我太宗特除之，自是大国侵矣，故名两属，恶有中国不役之理？辽人词遂塞。官至均州防御使。

张利一，字和叔，希一之弟。以荫补供奉官，仁宗时累迁嘉州团练使。辽人刺两属民为兵，民不堪其苦，利一绥徕之。其大姓举族南徙，慕而来者无虚日，利一皆发廩赈恤，且移诘涿州，辽人自是不敢复刺。改雄州团练使。

张洞，字仲通。父惟简，太常少卿。洞幼开悟，诵书数千言，为文甚敏。仁宗时以布衣上方略，寻举进士，调连州判官，再调颍州推官。为欧阳修所重，荐充秘阁校理，在馆久，数有建明。帝以为知《经》，因书飞白“善经”字赐之。官终于工部郎中。

鞠咏，字咏之，开封人，父励，广南转运使。咏举进士，试秘书省校书郎、知山阴县。仁宗即位，以太常博士召为监察御史。钱惟演图入相，咏奏罢之。王钦若忌咏，出通判信州，徙邵州。及钦若卒，咏入为殿中侍御史，官终天章阁待制。

张忠，字圣毗，开封人，慷慨不事生产。初隶禁军，拜指挥使。仁宗时累官澶州总管。会河决商胡，诏留戍满卒以助堤役，众不悦，将劫库兵为乱。忠潜捕倡谋者数人，斩以徇，乃止。

张孜，开封人。初补三班奉职，英宗时迁真定路兵马钤辖。时契丹欲背盟，富弼往使，命孜为副，议论虽出弼，孜亦安重习事。以劳迁西上阁门使、知瀛州，累官宁远军节度使。卒，赠太尉，谥勤惠。

罗拯，字道济，祥符人。举进士，累官江淮发运使。尝与副使皮公弼不协，比公弼被劾，拯力为辩理。谏官钱公辅尝论拯短，公辅党多在拯部内，往往荐进之。或讥以德报怨，拯曰：同僚不协，所见异也；谏官所言，职也。又何怨乎？时论服其长者。

马从先，字子野，祥符人。少力学，父当任子，推以与弟。举进士，累官太常

卿、知宿州。会大水，从先发廩以赈流亡，全活者数十万。改知寿州，以老辞。英宗谕曰：闻卿治行籍甚，寿尤重于宿，姑为朕往。既至，治如曩时。后以工部侍郎致仕。

杨燧，开封人。善骑射，从征贝州，穴城以入。贼平，功为第一，补神龙卫指挥使，累官宁远军节度使。卒，赠侍中，谥庄敏。

燕达，字逢辰，开封人。善骑射，以材武隶禁籍，授内殿崇班。神宗时为延州巡检，戍怀宁砦。夏人二万骑薄城，达所部止五百人，跃马奋击，所向披靡。又尝帅兵深入敌境，九战皆胜，累官武康军节度使。卒，谥毅敏。

吕海，字献可，开封人。祖端，仕太宗、真宗，为时名相。海举进士，累官御史中丞。王安石初拜参政。海上言：安石初无远略，好执偏见，文言饰非，惟务改作，天下必受其祸。出知邓州，海三居言责，皆以弹奏大臣而去，一时推其鲠直。及安石行新法，司马光始服其先见。居洛病困，目已瞑。司马光往见之，乃张目曰：天下事尚可为，君实勉之。卒，诏赠通议大夫，以其子由庚为太常寺大祝。

孙路，字正甫，开封人。举进士，为司农。元丰中，以荐为御史，言不合新法，左迁主簿，出判兰州。夏人入寇，以捍御功，迁礼部员外郎。元始初，司马光将弃河、隍，以路在边久召问之，路挟輿地图示光，力陈其不可状，乃止。历官兵部尚书、龙图阁学士，知河中府。

贺铸，字方回。元祐中通判泗州，藏书万卷，长于乐府。有《庆湖遗老集》。

刘舜卿，字希元，开封人。父钧，监镇戎兵马，与子尧卿俱战死，录舜卿为供奉官，历昌州驻泊都监。谕降泸水蛮八百人，改秦凤钤辖，数有功。元祐初进高州刺史、知熙州。时夏人连西羌鬼章，先城洮州，将大举入寇。舜卿乘其未发，夜趣城下，一鼓克之，俘鬼章并首领九人，斩馘数千。迁徐州观察使。卒，赠奉国军节度使，谥毅敏。

贾崑，字民瞻，开封人，善骑射。哲宗时累迁庄宅副使、庆州路都监。会夏兵数万骑围麟州神堂砦甚急，崑以数百骑往援，一矢殪其酋，众骇溃。帝嘉叹，赐以袍带，官终濠州团练使。卒，赠雄州防御使。

张近，字几仲，开封人。举进士，累官大理正、发运使。吕惠卿以不法闻，近受诏鞠治。哲宗谕之曰：此出朕命，卿勿畏惠卿。对曰：法之所在，虽陛下不能使臣轻重，何畏惠卿也？卒正其罪。官至显谟阁待制、直学士，徙知太原府。

王恩，字泽之。以善射入羽林，神宗伟其貌，补供奉库副使。靖国初，累擢卫州防御使，徙知渭州。括隐地三万余顷，分弓箭士耕屯，为三十一部，以省馈餉。拜武信军节度使，以检校司徒致仕。卒，赠开府仪同三司。

郑居中，字达夫，开封人。举进士，擢礼部员外郎。政和中知枢密院、加少师，累封崇、宿、燕三国公。会蔡京主攻契丹之议，居中曰：使百万生灵肝脑涂地，公实为之。由是议寝。卒，赠太师、华原郡王，谥文正。

路昌衡，字持正，祥符人。举进士，累官直学士，知成都，为政尚严。徽宗立，上书言：西方用兵，致兴大役，利源害政，佞臣蔽主，四者皆阴之过盛。后落职，入党籍，卒。赠龙图阁直学士。

赵适，开封人。徽宗时累官梓州路转运使。政和中，晏州夷酋卜漏反，诏以适为泸南招讨使，征之。山险难进，适乃捕獠数十，束麻灌膏缚于獠背。夜遣人及贼栅，乃燃炬，獠热狂跳，庐舍火发，贼号呼奔散，官军鼓噪攻之，赴火堕崖死者不可胜纪，斩俘数千人，晏夷遂平。加适龙图阁直学士，后迁兵部尚书。

胡閔休，字良弼，开封人。靖康初，应知兵科，中优等，补承信郎。二帝诣金营，閔休欲结士劫之，为何栗所止。南渡后，从岳飞讨贼湖湘，以诛钟子仪功，进成忠郎。飞被诬死，閔休杜门，称疾十年，卒。有《勤王忠义集》，藏于家。

张克公，开封人。举进士，官至吏部尚书。尝论蔡京罪，京衔之，欲以铨综稽违中克公，既又擿其知贡举事，帝以为所取得人，不问。卒，赠资政殿学士。

李璆，字西美，汴人。举进士，为国子博士，出知房州。时榷茶，贫民无所出，被系者数百人，璆至，悉释之。累迁四川安抚制置使。成都旧城多毁，璆至，首命修筑。俄大水至，民赖以安。三江有堰，可以下灌田百万顷，久废弗治，璆率部刺史合力修复，眉人感其惠，立祠，绘像于堰所。著《清溪集》二十卷。

邢焕，字文仲，开封人。以父任调汜水县主簿，累迁都承旨。屡奏马伸、宗泽可任，黄潜善、汪伯彦误国，擢保静军承宣使。绍兴初，入对，首陈川、陕形势利害，请幸荆南，分兵以图恢复，凡数百言，帝甚嘉之。进庆远军节度使。卒，谥恭简，追封嘉国公。

韩公裔，字子宸，开封人。以三馆吏补官，充康王府知客。金兵犯京，王出使，以公裔从。及次磁州，王与公裔夜由间道南行，至磁相人无知者，自是愈见亲信。累官岳阳军节度使，蚤著忠荃，为黄潜善、秦桧所抑。卒，赠太尉，谥恭简。

元

田滋，字荣甫，开封人。至元初，由汴梁路总管府知事入拜监察御史，累官浙西廉访使。辨理冤狱，人称神明，官至陕西行中书省参知政事。时陕西三年不雨，滋祷于西岳，果大雨。开仓捐麦五千餘石，赈贫者，百姓大悦。卒于官，追封开封郡公，谥庄肃。

杨敬直，字义方，泽之子。以儒术见世，祖累有文武功，历官至江西参政，迁两淮道宣尉使。寿八十七，卒。赠中书参政、弘农郡公，谥曰忠肃。

刘好礼，字敬之，祥符人。父仲泽，金大理评事。好礼幼有大志，知读书，通国言。至元初以荐召见，言多称旨，迁益兰等五部断事官，益兰民俗不知陶冶，水无舟航。好礼请工匠于朝，以教其民，民咸便之。或言榷盐酒可以作经费，好礼曰：朝廷设官要荒，务以绥远，宁欲夺其利耶！言者惭服。历迁澧州路总管，刑、礼、户部尚

书。

张楨，字约中，汴人。元统初举进士，为高邮县尹。性刚介，门无私谒，抑豪强，辩冤狱，人称为神明。拜监察御史，累上疏言祸乱之由及论大臣不职，皆不报。楨即辞官去，居河中安邑山谷间，累征不起。

归旸，字彦温，汴人。学无师传，而精敏过人。举进士，授颍州同知。时杞县人范孟谋不轨，诈为诏使，召官属署而用之，使旸北守黄河口，旸力拒不从，贼怒，系于狱，旸无惧色。及贼败，从贼者皆获罪，独旸免。拜国子博士，累迁刑部尚书、集贤学士兼国子祭酒。

明

周宪王朱有炖，定王子也。少有志性，负才夔甚，转学工诗、古文辞，旁通绘事，而楷、篆尤冠绝一时，所临摹晋、唐诸名贤法书，妙入山阴父子堂奥间，世称为《东书堂帖》，人多珍藏之。建文时裁削诸藩，以父被谗，莫能自白，遂上书引为己罪，得从末减，安置临安。成祖登极，诏王复国，亲制《纯孝歌》赐之。所著有《诚齐集》《乐府家训》《牡丹谱》诸书。正统四年薨，谥曰宪，盖王小心翼翼，奉藩惟谨故，始终不失其令名云。

滕克恭，字安卿，祥符人。元至正壬午举进士，累官集贤馆学士。元末兵起，避地钱塘。明初复归祥符。洪武辛亥、甲子两主河南乡试，皆称得人。寿百餘岁，所著有《春秋要旨》《谦斋稿》若干卷。

安然，祥符人。元末为山东行省左丞，守莱州，率众归附。洪武元年授起居注转给事中，擢山东行省参政，寻召入为工部尚书，复除河南行省参政。蔡河壅塞漕运不通，然督工疏导，不逾月而成功。八年黄河决开封大黄河堤百餘丈，然集丁夫三万塞之。累官至御史中丞，坐事免归。复召为四辅官，论事赐坐多所裨益，十四年卒。

王幼学，字行可，元丙午科进士。洪武初举贤良，三年设学校，为开府学训导，以疾辞。十五年，后知训导，终于家。

张玉，字世美，祥符人。以元枢密知院来归，明祖礼遇甚厚，玉感奋思效，累以功授燕山左护卫指挥，迁都指挥同知。文皇起兵靖难，首用玉策北平九门，三日悉定。玉攻薊州诸县，下之。长兴侯耿炳文率兵二十万屯真定，玉往觐之，还言：军无纪律，乘其未备，一鼓可破。上用其言，炳文遂大败。李景隆以兵驻河南，玉从上追之，进兵攻东昌。上被围，突出，玉不知上所在，复入阵大战，杀数百人，玉亦被创而没。上闻哭之恸及，即祚，追封玉荣国公，谥忠显。昭皇嗣位，加封河间王，改谥忠武，配享文皇庙子辅。

王僎，字幼度，祥符人。仕元为国子助教。洪武初征为翰林修撰，与典试，又命于大本堂，授诸王经，寻迁待制，同宋濂修辑《洪武正韵》昭鉴录诸书。上悯其老，赐致仕。后以子弘为龙江递运，忤丞相胡惟庸，置于法，惟庸败，上召僎至京，慰劳

甚至，赐绮帛，给舟车送归，以寿终。

范济，字汝舟。至正甲午科进士，闲居不仕。洪武四年以儒士起用，除授江西广信府知府，吏民怀服。

张薰，字希贤，祥符人。洪武初举明经，为蒙泽县训导，迁秦府长史，卒于官。所著有《学》《庸》句解二卷。子遂能世其家学，以乡举仕，至浙江盐运使，撰《祥符人物志》四卷。

兰植，字丛芳，祥符人。该博经史，尤精于《易》，能诗文。洪武辛亥举进士，归里。十四年，礼部尚书任昂以博学弘辞荐任吏部员外郎。

李延中，字伯庸。洪武初举茂才，授湖广参政，以治行擢庸西右布政使。以疾卒于官。

赵玘，字云翰，祥符人。元末兵乱，玘在襁褓，父母携之匿林莽间，卒遇虎，置于地，虎熟视而去。及长，多才，善属文。洪武中膺乡荐授兵部主事，命覈天下兵马，诸路屯戍悉当，上意升员外郎，寻升浙江右参政。文皇嗣位，遣使交趾，却其馈问，还。历升刑、工、礼三部侍郎，未几升礼部尚书，赐宴于华盖殿，并撤御筵饌馐，遗其母以荣之。仁孝皇后崩，上命玘相山陵，得昌平之黄土山，上称善，封为天寿山。赐玘文镪宝绮。复命督开隆庆、保安、永宁诸郡县，抚辑有方，新集之民悉安其业。改兵部，丁母忧去，起复专理塞外兵政。上北征，玘转馈饷不绝。昭皇嗣位，再改刑部。宣德间请老，卒于家。所著有《伦父集》。

王铎，祥符人。洪武中贡士，授陕西凤翔县教谕，训士有功，升福州府学教授。复以绩最，擢刑科给事中，未几迁贵州按察司副使。

王观，字尚宾，祥符人。洪武初，以乡举入太学，授苏州府知府，政严民畏。奸吏钱英累构陷长吏，观廉得之，缚至庭下立捶杀之，百姓称快。事闻，高帝遣行人白□中赉敕褒之，劳以羊酒。岁祲，民逋无所从偿，乃延郡中富室集郡衙饮食之，使各量出资以代贫者之逋，众皆如指，逋乃完。朝廷嘉其能，榜谕天下，以励怠政者。今祠于苏州，称名宦。

宋文，字彦周，祥符人。隐居，学行著闻。洪武中河南参政郑居贞以隐士荐送京师，授山西按察司副使，以廉能著称，风纪肃然。

刘醇，字文中，祥符人。善属文。元末隐居不仕，洪武中，以荐为原武县训导，寻弃官归周王，延为世子师。会右长史缺，王请于朝，以醇为右长史，数进规讽，王重之。后以疾致仕，所著有《菊庄集》若干卷。

李伟，字彦奇，人品魁伟。时初立邑、庠，为邑诸生。洪武二十六年以事赴京，除直隶凤阳府临淮县知县。秩满，升鸿胪寺少卿，升本寺卿。

文郁，字向彬，初为邑诸生，以才行见称。洪武二十六年以事赴京，后除松江府华亭县丞，迁山西平阳府蒲县知县，秩满，升山东道御史，复升工科都给事中。

张辅，字文弼。弱冠从文皇靖难，以功封信安伯，进新城侯。永乐二年，安南黎

季犛杀其君日焜而篡立。上命成国公朱能为大将军，辅为右副将军，往讨之，师次龙州。大将军薨，上即命辅统其军，辅檄数季犛二十罪，一鼓平之，擒季犛，定安南为郡县。还，论功封英国公。未几季犛余孽简定及陈季扩相继作乱，两命辅征之，皆擒贼以归。上以交人新附，即以辅往镇其地，十四年冬，召还。二十二年从上北征，上大渐，辅受遗命统诸军务。昭皇即位，进辅太师。正统间扈从北伐，死于土木之难，追封定兴王，谥忠烈。弟軌以南征有功，累迁右都督，进封太平侯。卒，赠裕国公，谥忠襄。

张信，字彦实，祥符人，辅从兄也。洪武己卯举乡试第一，永乐初拜礼科给事中，转刑科都给事中，封驳纠弹无所顾忌，擢工部右侍郎。会河决，坏民田庐，上遣信往视，信疏故道以杀水势，河患遂除。已而浙江守臣奏江塘湖决，复命信往，治数月，事襄，寻转兵部左侍郎。寻以辅故，改锦衣卫指挥同知，累迁四川都指挥使，居蜀十五年，名振羌夷，百姓怀之。

郭良，字景直，性重厚谨恪。初为诸生，永乐四年由楷书入国子监，复任工科给事中。永乐十五年，升江西按察司副使。

高举，字云翰，少补郡诸生。其父选为勇士戍边，举即弃学代父往。永乐戊戌举进士，授兵科给事中。慷慨敢言，坐是不合于时，解官归。其居不蔽风日，恶衣菲食弗厌。巡抚于谦过其庐即止避道。年九十卒。

苏璟，字士英，祥符人。永乐癸卯乡举，宣德元年授鸿胪寺序班，正统初刑部尚书。魏源知其才荐之，授乾州知州。下车首兴学校，作士类。会旱，璟祷雨，即雨，无何以忧归。起复，补知滁州，均其赋役，民得休息。偶飞蝗入境，璟祷于城隍，坎地以待蝗，悉自投坎中以死。寻以考绩入京，值土木之变，选授监察御史，奉敕守永平，募壮士，日夜训练，京东倚以为重逆，退迁两淮盐运同知致仕。卒于家。孙汉，正德中膺乡荐为临邑知县，居官廉谨，吏民怀之清。举正德己卯乡试第一。

刘安，字符静。举永乐癸卯乡试，宣德庚戌授山东企乡县学训导，以训士有功，擢山东道御史，巡按南北京畿，除陕西按察司副使，应诏陈时务三策，英庙可其奏，寻乞归，卒，年九十餘。

祝暹，字孟昭，祥符人。举宣德癸丑进士，授户部主事。正统戊辰从征福建叛寇邓茂七有功，升佥都御史巡抚保定。未几卒于官。

王宇，字仲宏，祥符人。正统戊午举河南乡试第一，明年举进士，授南京户部主事。九年秩满升江西抚州府知府，性清介峻洁以风节自励。金溪令刘绶以虐闻，宇白法司黜之；黄山有虎为患，宇为文告神，虎即引去。群盗聚劫，宇曰：此良民也，为饥寒迫耳。发仓赈之，民皆感泣。以治行第一，擢山东右布政使，进右副都御史，巡抚宣大。石亨、石彪怙宠骄肆，宇上疏劾之。及亨败，朝廷嘉其忠直，改大理寺卿。卒于官。

郑宁，字志道，祥符人。正统壬戌进士，授刑部主事，历员外郎中。操持清严，

人不敢干以私。居刑部十六年，以才望擢四川右布政使，擒灭巨盗赵铎，朝廷赐彩币二袭。唐千户妖言倡乱，逃匿山泽，宁单骑往，谕以祸福，乃就缚。寻以征石和尚之功再受白金彩币之赐，累官至都察院都御史，巡抚宣大。居数年引疾乞骸骨，三疏而后获命，还里囊无餘资，朝夕尝不给，诏有司岁给食米四石终其身。

张遂，字文吉。正统甲子乡举，景泰辛未授户部主事。会册立东宫，受白金彩币。会计钱赋考最，敕进承德郎，特命督粮储，称职。寻升郎中，奉敕总督宣大粮储协赞边务，后转浙江盐运使，疏潞蠹弊，饬政以明，卒于官。年八十，所著《祥符人物总志考》贻后，录若干卷。

王廷，字仕仪。正统甲子乡举第一，卒業太学。缙绅惜其才，知和曲州，迎亲就养。上疏编户以姓，及止贡马立学垦田、课种、桑枣，夷俗丕变，改易州。易州地控京师，飭理得体，人称保障。成化元年充会试弥封官，晋南京宗人府经历，进阶赐四品服，卒于官。子邦用《礼记》魁省试，孙梦旭壬午解元，鲁孙质举人。世家科目。

王豫，字用诚，祥符人。景泰甲戌进士，授礼科给事中，立朝謇谔，数上封事，皆弃其草。奉诏使安南，豫谓蛮夷素悍，先谕之以礼，既格服，然后入，事竣，馈赆皆峻却弗受。寻擢湖广参议提督太和山节制均襄军民，多善政，秩满当迁，百姓上疏恳留，诏从之，加三品禄。未几致仕归，囊橐萧然。子纬，成化丁未进士，授工部主事，累官至山西参议。勤敏雅饬，有父风。

和维，字振纲，其先祥符人，后徙居陵川，至维复通祥符。举景泰辛未进士，授刑部主事，五年迁浙江佾事。天顺初英庙慎简藩臬大吏，得维等十四人，召至便殿赐宴，人各宝镪千贯，面谕遣之。维至浙，首发藩臬吏不法状，列疏以闻，得旨坐诸不法者若而人。姜鲁者，浙之机户也，浙有贩丝民被劫，亡其刀，鲁诬坐而无左验，维召贩者问之，云：丝囊有印识。维密遣逻者至旁邑获焉，一讯具服，并得所亡刀。为佾事八年，竟以忤权贵免归，著书饮酒，又三十年卒。

岳璇，字文玘，幼以颖敏称。景泰庚午举于乡，辛未登进士，授山西道监察御史。天顺元年英庙简天下贤廉，璇以才望擢湖州府知府九年，民怀其惠。成化中进阶中宪大夫，擢参政，寻擢佾都御史，卒。所著有《仕优小藁》。

吕益，字伯谦，祥符人。景泰甲戌进士，授陕西道监察御史，憨直执法，不畏权贵。昌平侯杨俊以秽迹被劾，石亨侄壻大同都指挥廖杰恣横不法事闻，益先后鞠问，各抵于法。官至陕西按察司佾事，竟以亢直任事被废，居家三十餘年，杜门谢交，以贫自安无所营于世，自乡饮外，足迹未尝一至公府。卒年八十。

李珣，字廷瑞，祥符人。景泰甲戌进士，授户部广西司主事。珣操履廉介，榷济宁舟楫羨银数万两，尽输之官。迁四川司员外郎，奉命覈察畿内郡县府藏，尽得其渔侵虚耗之状，参劾罢黜者千餘人。偶坠马伤足，弗便朝参主。爵者念其守官清苦，擢长芦盐运使，欲其循故例稍自腴，珣严立条格，锱铢无所取，其俸禄分与閭里亲族以赙贫乏。迄致仕，笥无长物，惟故人赠《赤壁图》一幅，故田庐弗益尺寸。饘粥尝不

给，课童蒙为业，宜人王日夜绩不辍，家居二十年以寿终。

傅皓，字孔暘。景泰甲子乡试第二名。成化时授顺天府通州同知，宽厚平易，甚得民心，州民伏阙保留，转本州知州。严裁省之法，权贵不敢干以私，任十二年，加朝列大夫俸级。改知济宁州，节爱亦如治通州时。以老请归，寿终。

袁江，字自岷。中天顺壬午乡试，癸未登进士，授户部主事，出督粮储，严谨，中贵无敢犯。丁母忧，居家不入城市。以廉介迁盐运使，课法谨严，客商称善。僚案有私者辄劝戒之，却金理饷，益殫清修。大司徒题奏旌扬以风励天下，卒于官。

王继，字述之，祥符人。成化丙戌进士，授监察御史，出按山西。不避豪贵，累迁山西按察使。时中贵奉命采石胆于紫碧山，求之弗得，甚为民患。继令给取小石子给之，中官怒：石胆，古书所载，何以为无？继曰：麟凤亦载古书，今有之乎？事遂寢。寻以山西右布政，拜右副都御史，巡抚陕西。哈密忠顺王为土鲁番所灭，据其土地，继训士练兵以威振之。土鲁番钦服，立忠顺王，后上赐白金文绮，擢户部侍郎，进尚书。中贵李广以左道见宠任，权倾中外，大臣多贿结之。及广事败，言官请并治，大臣与广交通者上宥不问，明日早朝大臣空班谢罪，惟继与马文升不与，上益重之。改南京刑部，寻改兵部参赞机务，卒于官，赠太子少保。

杜明，字文昭，祥符人，成化戊戌进士，授礼科给事中，奉命察陕西、甘肃洮河岷州等处，边储明覈，举蠹弊，黜有罪者若干人，风采肃然，累迁右通政，卒于官。子昌，字世昌。正德戊辰进士，授监察御史，按山西，督率将士擒流贼有功，特敕移檄泽、潞，抚辑残破之民。寻以太恭人讎至，惊恟感疾，卒。

杨璉，字用章，祥符人。成化乙未进士，授丹徒县知县，有清操，擢监察御史。会科道以言事忤旨，宪庙甚怒。璉曰：谏官朝廷耳目，若以尽职获谴，谁敢复言。上为之霁威。都御史秦纘奏安遠侯都景不法，勘得实，诏景免死，纘致仕。璉疏奏景罪既明，纘不宜摈弃，上从之，起纘为户部尚书，璉直声益著，仕终山东按察司僉事。所著有《弦斋稿》。

康厚，字本淳。成化甲午举于乡，戊戌举进士，知丹阳县有声，擢广东道监察御史，巡按江西直隶，监督军储商税，所至肃然。乙卯监应天乡试，迁温州府知府，改知顺德。值饥，发赈，全活甚众。总督吴公叹曰古循吏也，礼币旌焉。条陈八事，嘉纳用之。累著治绩。癸亥引疾致仕。进阶亚中大夫。

李环，字佩德，祥符人。举成化丁酉乡试，选广平府推官，丁忧起补延平府推官。会守缺环署，延平沙县民胡天秀杀人亡命因为乱。环募壮丁捕获之余，弗问，境内悉平。九载迁青州府通判、督粮储。山东盗起，岁凶，民无所输租，环以帑金代抵粮额，约民丰稔补偿。事闻嘉之，诏免民偿金，以老请归。卒于家，著《训蒙三字经》传于世。子士允，工古文辞。正德丁丑进士，仕至陕西苑马寺卿。

李梦阳，字献吉，其先扶沟人。国初徙居庆阳，父为封丘王教授，遂家祥符。母高氏梦日入怀寤而生，故名。十八举陕西乡试第一，明年为弘治癸丑举进士，授户部

主事。金元以来，文袭靡靡之音，梦阳与何景明、徐昌谷、王九思、边贡倡为古文辞，断自秦汉六朝，以下无观焉，海内翕然宗之。寻转员外郎，时外戚寿宁侯张延龄怙宠骄纵，人莫敢问。会诏直言，梦阳上封事，缕缕数千言，陈二病三害六渐，劾寿宁侯诸不法，语稍侵及中宫，昭圣大怒，有旨下梦阳诏狱，寻释之，止夺俸三月。孝庙深知梦阳忠诚，大学士谢迁复为上言之，与上意合，故得保全。正德初，刘瑾等用事蠹政，户部尚书韩文等具疏劾之，梦阳代为具疏。瑾知疏出梦阳，矫旨夺其官，籍为党人，复罗织他事退下诏狱。内弟左国玉从梦阳至京上书，康修撰海力救得释归。瑾诛，起江西提学副使。梦阳伉直负气，寮友恶其侵官，江御史会按江西，与梦阳不相协。梦阳疏其事，江亦论劾梦阳，忌者咸欲重伤之，赖少傅杨一清、大司寇林俊力救，从未减免归大梁，累荐竟弗起，以病卒。所著有赋、颂、乐府、古诗三十六卷，书疏、碑志、记序、杂文二十七卷，《空同子》八篇行于世。子枝，举进士，南京工部主事，谪海州同知，才藻宏丽有父风。

李源，字宗一，祥符人。成化丁酉举乡试第一，弘治丙辰举进士。官兵部武选司主事，历员外郎中。逆瑾窃政，源守正不阿，失瑾意，构以他事谪襄阳府司知。瑾诛，起湖广布政司参议，以疾免归。有集若干卷。

李钺，字虔甫，祥符人。弘治丙辰进士，授山西道监察御史，巡视中城。不避权贵，出按河东鹾政。时安邑有疑狱数年弗决，逮系甚众，钺一言立折之，人称其明。正德初，会疏劾逆瑾罪恶，乞置之法，瑾御之诬坐他事罚粟五百石输边。仍出知巩昌府，以治行，擢四川按察司副使，从征巨寇方四有功，赐以银币褒之，加俸一级。累迁右金都御史，巡抚山西，逆寇苛岚，钺败之，斩首百五十级，获马千馀匹，复赐银币，加俸一级。山西巨盗武廷章反，钺歼廷章，平其地，加俸一级，进兵部侍郎署部事。西边告急，钺以素谙边事，命兼金都御史行边，钺驰至固原，败之。诏钺总制三边军务，平凉、延绥有警，皆大捷，移镇凤阳，进兵部尚书。居三月，卒，赠太子太保，谥恭简。

田汝耜，字勤甫，祥符人。学无所不窥，工古文辞。与李献吉、何仲默、高子业、左舜齐结社倡和。汝耜举弘治十八年进士，授行人，拜刑科给事中。疏荐大臣以忠谏者如韩文等，当及时起用，忤旨。又劾武帅时源恃功淫纵，不报。寻以伉直迁江西提学僉事。汝耜既以文章擅名于时，刻意修古，诸士之文毕下鲜当意素负时望者，多置下考，众口哗然。又遵敕内条例，具疏荐劾知府同知、知县、教职十余人，按臣及僚僚恶其侵官，以论劾调山西，寻迁湖广按察司副使。致仕归，年四十五，环堵萧然，仅蔽风日，力田养母，诵读弗辍。所著有《周易纂注》《水南集》若干卷。弟汝耕，字深甫。少负奇气，善为诗文，与兄齐名。正德丙子荐于乡试，南宫数困，晚年谒选兵部司务，郁郁弗愉，踰年卒于官。遗稿二册，同邑陆道涵刻传于世。

李士允，字子中，祥符人。父环，青州通判，有治行。士允未弱冠擅才名，工古文辞，不喜近代诸家语。十八举于乡，正德丁丑举进士，与何景明、薛蕙、颜木、陈

沂、曹嘉、王廷陈、马汝骥诸君子俱以著作高海内。士允体孱弱，谢病归。久之起补苏州府推官，累迁江西布政司左参议。会太仓海寇之乱，迁按察司副使，兵备太仓。士允以计擒获首恶，餘党解散，朝廷赐以白金文绮。崑山盗劫富家财，捕者诬执平民，拷掠殆毙，士允一讯即释，果获真盗。寻进浙江参政，士允以病谢事。会御史按其地，误以不迎为慢懈，他事奏勘。事白，补山东副使，擢陕西苑马寺卿，引疾乞归，归十四年卒。士允才高伉直，嫉恶太严，故不得久于位。所著有《李氏山藏集》行于世。从子纂，举嘉靖乙未进士，累官陕西左布政使，别有传。

熊爵，字献子。正德辛巳进士，授宁津知县，以治行卓异，擢监察御史，风裁自持，弹劾不避权贵。世庙时，夏言方贵幸，以吏科都给事中兼翰林院侍读、都察院佥都御史。爵疏奏夏言进用太骤，非言之福，辞甚危切，奏虽寝，直声震天下。奉命按属，贪墨望风引去。会有真寇之警，爵决策剿捕，寇悉平，玺书银币旌之。镇守太监萧通贪恣不法，爵疏劾免，然以持法不阿取怨当路，外补山东按察司佥事，旋谪乾州判官，量移平凉，再迁周府长史。既夏言及于祸，当事者欲进用爵，爵已卒，士林惜之。所著有《平真外史》《熊乾州集》《秋兴诗》行于世。

郭凤仪，字舜符，祥符人。嘉靖丙戌进士，仕至云南按察司副使。工古文词，尤精于诗字。临《急就章》肖其神，亦能画，诗尤重于世。所著有《均奕集》。兄凤翔，正德甲戌进士，仕至陕西按察司副使。子中，嘉靖丁未进士，仕至广平府知府。

王教，字庸之，祥符人。嘉靖癸未进士及第，授翰林院编修，与修会典，陈时政十二事，上嘉纳之。迁侍读三分校会试所录皆知名士，充经筵讲官，迁国子监祭酒，疏请薛文卿公从祀，识者韪其言。寻以原官兼右春坊、右谕德祭酒，兼宫僚自教始。亡何迁南京兵部右侍郎，议以盐引羡金办漕舟料价，民甚便之。后以入贺圣节，道病，卒于家。

高叔嗣，字子业，祥符人。赋性颖特，年十六著《抒情赋》几万言。登嘉靖癸未进士，授工部营缮司主事，改吏部稽勋司主事，历员外郎中。与薛君采辈相倡和，名震一时。会外戚蒋氏乞封，叔嗣坚执不可，忤执政意，谢病归。筑读书园于西郭外，为隐居计。居三年起补原官，复以失权贵意出为山西左参政，迁湖广按察司，卒于官，年三十七岁。所著《苏门集》传于世。叔嗣兄曰仲嗣，丙戌进士，历官广西府知府。清修传雅，攻古文辞，所著有《广玄集》，与叔嗣齐名，世比之晋二陆云。

王琇，字符玉，祥符人。宣武卫籍，生而能言，既长，无书不读。师事李献吉，而与高子业为友。嘉靖癸未举进士，累官南台御史。迁武德道宪副。贼曹获二盗，群盗劫之，杀贼曹，琇捕得群盗尽毙之门下。胡守忠奔媚，得幸世庙，先是守忠过琇，据上坐，琇恚而绝之，由是憾琇。世庙南巡过武定，为胡所绌，廷杖之，遂病，寻迁天津宪副，卒于天津。琇性廉介，居官十六年，篋中赢金三觔，付长子他日为诸子业，病革谓家人曰：诸属尚有羡馥，我死慎无利之。既卒，郡吏来馈，诸子竞弗受，子五人，季曰中逵，隆庆戊辰进士，为黄县令。

和春，字大龄，祥符人。金事维之孙，父颢为周府郡王教授。春工古文词，与李献吉同游，皆以著作成名，往来倡和，具载《北地集》中。十八岁以儒士举于乡，后以乙榜授晋州学正。春善为奖引诸士向化。直指王巡历至晋州，诣学行射礼。命春耦射，连发破的，王皆负，阴忌之。春引疾致仕归，饮酒赋诗，与朋旧相过从，又三十年乃卒。所著有《雪台遗稿》二十卷，藏于家。从弟夏，字大芳，成化乙未进士，暉之子。十岁即能诗，初受毛诗，后编读五经。字法颇平原，三体皆入妙境。与兄春齐名，以选贡仕，终河间府通判。弃官家居二十余年，未尝轻见一人，诗文字迹见重一时。

左国玘，字舜齐，尉氏人。父尚镇平王府广武郡君，遂家祥符。七岁能诗，读书日数千言，字法拟颜鲁公。弱冠从李献吉就学于京师，正德十一年举于乡，才名籍甚。四方好古之士皆千里来从游，国玘至都下，公卿争迎致之，得其只字片辞辄为宝之。累试南宫弗利，当路者欲荐入官，辞弗就。归老汴上，博极群书，肆力著作。所著有赋、颂、碑、诔、序、记诸体诗各累万言，行于世。人称之为中川先生。

李蓁，字懋承，祥符人。举嘉靖乙未进士，授直隶蓟州知州，蓟近京师，多权贵，有欲加赋于郡者，蓁力抗之，被诬奏逮系。寻事得白，竟如蓁议。秩满，迁工部员外郎，以父士允尚枣阳县君，于王亲例，改松江府同知，累迁山东按察司副使，兵备密云。会古北口有警，蒲州杨襄毅公时总督蓟辽，蓁从杨公率兵御之，立矢石间，对垒三昼夜，敌退，众咸喜。蓁曰：诈也，不利于此，将图于彼，龙工峪土墙易破，可急遣将守之。比遣将至，敌已近墙，知有备，遁去。以捷闻擢参政，寻晋按察使，仍备密云，赐以银币，擢陕西左布政使致仕。归里治田、课子，未尝一至公府，让先人遗业予弟，治城东田仅十顷，里人高之。

李濂，字川父，祥符人。幼颖敏，好读书。九岁攻古文，尝作《里情赋》，为李献吉称赏，与樵郡薛君采齐名。正德癸酉举乡试第一，明年举进士，授沔阳州知州。会川、襄水溢，大浸。濂疏请蠲赈，得旨报可，全活数万人。汉阳有贵臣请以沔隶汉阳，部覆如意，濂疏奏，极言民情弗便，事遂寝。累迁山西按察司佥事，理屯政，会学宪缺，濂摄其事，不两月而试周一省，士人悦服。坐忤权贵，嗾言者论罢，遂致仕归，年才三十八，杜门谢客，日以著述自娱，又四十年卒，年七十九。所著有《嵩渚文集》一百卷，外集、绪集若干卷，所辑《祥符文献志》《汴京遗迹志》《乡贤传》《医史》《朱仙镇岳庙集》《稼轩长短句》诸书并传于世。

李承恩，字君赐，祥符人。正德己卯举于乡，明年下第。偏购名理诸书，闭门潜玩，每有心得，见之著述，多先儒之所未发。所著有《易大义》《诗大义》《书拾蔡》《学庸拾朱》《孟子说》《西铭定性书》《太极图说》等书，皆为之解。《阴阳论》《心印图》《格物致知》《说数》《往者顺知来者逆说》《河滨目录》存稿总若干卷。

张恩，字子推，祥符人。少孤，家贫力学，授徒以养母、抚弟妹。嘉靖丁酉举乡试第八名，两试南宫皆乙榜。因母老署宿州学正，丙午分校江西。时各省阅卷皆属诸外帘，有司受成于御史应聘，各房考具空名而无所事事，恩阅卷得隽，以职事力争御

史，御史气夺，竟录所取士。寻晋为山东平原县知县，有疑狱累年弗决，恩斋而祈于神，得异梦，一讯即决。己酉以外帘分校山东，得平原张蕙、濮州陈忠翰，后皆成进士。在平原五年，多惠政，平原人祠之至今。晋为凤阳府同知，会河决徐淮，恩随河臣相视原湿，开新河以通湮淤河，功成，钦赏银十六两。巨寇师尚诏起兵睢州，破归德，拥众南侵。恩从大中丞吴公守宿州，贼至，围宿州，恩身亲矢石，樱城固守，不解甲者三日夜，贼引去。寻以母忧去官。起补湖广黄州府同知，时分宜父子当国，士人多以贿进。黄州守某者，分宜同乡且周亲，私谓：予我千馀为相君寿，则郡守可得也，即不给吾，以府藏为若输之。恩谢曰：余历官十八年，产弗及中人，势不能取盈中，相君意又借资于府，实以勤辱郡守升沉数也，何敢私望幸焉。居二岁倦游，致其仕归，清介寡营，日与故旧斗酒相劳。所著有《真率饮记》，其他诗文多不存稿，又六年卒。

杨根，字伯深，先世中山人，移家祥符。父泽膺恩荐，卒業太学。根为博士，幼即以文成名。乃动必慕古，举步不失尺寸，与人不妄交，游士皆以严见惮。嘉靖辛卯举于乡，数困公车，谒选理凤翔郡。根奉法惟谨，尝摄陇州议丁粮，里递多便于民，随御史按部惟剔其大蠹、巨奸，馀悉不问。再理承天，江水溢，湮民田庐，根画策筑堤，水不为蓄，输羨陂置垦田数千亩，为诸生饘粥费，稍迁延安府同知，调度兵马、收支刍餉、缮修城堡、稽核功罪无不倚办。根以廉直执法，随事奏效。尝奉檄防秋固原，申严纪律、倡励士气，边檄无警。嘉靖丙辰摄郡符入觐，因称病不任职，致其仕归。归六年卒，郡中曹司马表其墓曰：贞静先生。

高等，字企夫，举嘉靖己酉乡试，选直隶柏乡县知县，居官清慎而爱人，一以修举废坠、躬行教化为任，杖人不至十，治讼不取赎醵，惟罚谷备赈，询问民隐，温温然若家人，百姓视之如父母。值岁旱，等斋戒祷神，自暴于烈日中，俄而大雨，百姓呼为知县雨。万历甲戌入觐，卒于京，囊橐萧然，无以为敛，同乡宦游京师者经纪其丧。柩过柏乡，百姓攀拥号泣，至为罢市。留数月始归，输田立祠祀之，至今祥符士人过柏乡者皆曰吾高公乡里也，治具款待子孙，贫甚，时醵金移之。

曹金，字汝砺，祥符人。嘉靖癸卯举乡试第一，丁未举进士，授南通州知州。灶丁张伦劫杀官役，捕者奉御史指求盗，急，不得，妄引良民大姓四十八人，严刑诬服，死者几半。金力白其冤，御史怒，未几果获真贼，全活甚众。迁山东兖州府同知，督抚王公犒军德州军，卒聚而欢。金廉知其首事者，指名呼之，其人即出，众随解散。晋浙江右参议，守温处，倭寇犯青田，金力守孤城七日夜，倭引去，城得保全，晋海道副使。金以伉直忤贵幸意，罢归。隆庆改元，诏起补山西按察司副使，累迁陕西左布政使，入为顺天府尹刑部右侍郎，改兵部右侍郎兼金都御史，巡抚陕西。斩盩厔妖贼，地方以宁。寻引疾请归。初金与新郑高文襄公为周亲，穆皇时文襄秉政，金亡所私谒，诸借誉为资者亦无敢及金门。文襄以严正见惮。金历仕几三十年，官至卿贰，产不踰中人，治家教子严而有法。既归，杜门谢客，人罕得窥其面，台省

数论荐，竟不起。家居十七年卒，谕赐祭葬如制。所著有《传川文集》藏于家。

陆柬，字道函，举嘉靖庚戌进士，授大理评事，仕至贵州都匀府知府。博雅好古，攻诗文，以表章遗文为己任，苍莽间有断碑残碣，皆操笔往书之。郡邑文献多所搜采，所著有《陆道函集》若干卷行于世。

朱光宇，字德明，祥符人。举嘉靖乙丑进士，授户部主事，改山西道监察御史。初按贵州，再按福建，皆以病归，未得竣事。万历壬午诏以原官起用，又数年以病卒于官。光宇识度凝远，守严一介。御史十八年，俸不满两考。光宇坦然居之，无躁竞意，自福建归挟两医，崇安令朱知其贫，括赎缓若干，充道里费。光宇峻拒之，阴遣使费百金从医行，光宇归家闻状，怒曰：令不知我，岂以医故为县官费。竟还之与人，躬躬不失尺寸，无卑容亦无亢色，无问识与不识皆称为长者。卒之日，囊橐萧然。子孙税屋以居焉。

王中逵，字道卿。琇子，九岁孤，家贫甚，受学于伯兄。举隆庆戊辰进士，授山东黄县知县。黄僻在海奥，往时令皆相沿为苟且，中逵至，厘定赋籍，开垦荒田。一以修废兴利为己任。儒生某者得罪于父，携其孥奔莱阳。已而儒生溺死，妻归，而父诬其奸状，讯之者置之辟，公辨得释。黄山邮舍徒为丞所困，几死。中逵与之约，如期至，尽脱之，全活数十人。寻以忧归，赢缓四百金皆藉而留之。当道者念其贫，醵金五百贖之，竟弗受。中丞梁公填中州时过中逵，会雨骤至，屋溜没胫。中丞愿捐美缓授之室，中逵谢曰：尊贵临门，草土之人不敢逃匿，俨然备宾王之礼者，以明公知我也，乃因以为利，明公不知我也。竟弗受。迨卒，贫无以为敛，大司马杨公经纪其丧。子三，季曰正志，万历戊戌进士，为富平令，以论劾恶党逮死诏狱，别有传。

王用章，字汝平，祥符人。少机警，从师受书，一过弗忘。嘉靖辛酉举于乡，乙丑举进士，授昆山令，昆山故饶，自倭警后稍瘠。用章莅任，复屡值水旱，赖用章得以全活，不至流徙。三年政成，百姓安堵。士大夫不敢私说吏关，民凛凛奉约束。举治行高等，坐王亲例不得入为京朝官。晋常州府同知，仍治昆山。又二岁，王亲例解入为礼部主客郎，用章曰：吾治经术，取科第。为吏，列内朝。随试取效可以毕吾志，又何求。于是谢归，日纵酒而攻诗，自献吉、子业后，用章继之，雅韵复兴。居家二十五年无所请谒，宦河南者时造其庐，则引避不出，甘贫乐道，无营于世，好奖藉人，亦好面折人过，人亦以是见惮。所著有《松云集》藏于家。

朱睦㮮，字灌甫，周藩镇平恭靖王四世孙，父安河，封奉国将军，母张氏淑人。生而端颖，李献吉一见即奇之曰：公家飞兔也。十岁遍谒名儒受经学，甫弱冠六经皆通大义，益购秦汉以来诸家经解，日夜读之，诸所发明多得之于世儒，笺注之外充精于《易》《春秋》。博通古今，故实以及经世之务考究，皆有成画。抚院监司至于诸郡邑，长吏咸就㮮问政，应之若响，莫不毕效。㮮名重海内，名流皆与交欢，远弗能至者则束书千里，定为神交，而四方之士担簦游梁者皆赖为馆谷，门下食客履相错也。即第建万卷堂，购书三万馀卷，日诵读其中，至老不倦。上命各藩立宗学，㮮奉旨简

为宗正，群宗生五百人，日督诲之，皆成文雅之儒。櫟生有至性，事奉国暨张淑人甚备。居丧三年不入内寝，先世遗产尽予诸弟。自奉俭朴，斤斤若儒生。卒年七十，部使者闻于朝，上以櫟学行并优加祭葬。所著有《五经考疑》《授经图》^①《陂上集》《中州人物志》《忠臣列女传》《大明帝系》《周国世系》《镇平世系》《逊国纪》《中州文献志》《训林从祀考》，而《河南通志》《开封郡志》多所参定，遗书数十种行于世，经学尤著。子勤美，号竹居，博学善属文，嗣为宗正，有父风。

张孟男，字元嗣，占籍中牟，世居祥符。举嘉靖乙丑进士，授广平府□官，以治行被征。坐忤御史，补汉中府同知，累迁尚实司丞穆庙。时新郑高文襄公秉国，孟男为内兄子，且系文襄公所录士。孟男自旅见外无私谒，文襄公以故望之，四年不调。迨文襄公为江陵所构，以严旨谴归，危甚，亲暱皆引匿，独孟男周旋不避。江陵当权，矫文襄公所为，孟男一岁三迁，晋南京太仆寺少卿，欲引附己。孟男曰：始予不媚新郑，受相君知遇，今何敢媚相君负知己。遂不复谢。江陵败，累迁至工部侍郎，掌通政司事，则疏请御门，裁答章奏，语甚切至。已晋刑部侍郎，改户部，晋南京工部尚书，寻改南京户部尚书。留都赋额半于京师，有司玩愒，积逋弗完，以致留计匱竭，孟男疏请重总督粮储之权，视其举刺为守令殿最，由是积逋尽输而庾帑皆充。偶为蜚语所中，屡疏引疾得请还里。五年有诏，以原官起用。孟男复入南都，举向所规画益申饬之，而佐以清勤为郎吏，倡冢子之丧主者治梓费金百两，括俸偿其直。摄督储四年，省水衡钱不资，别建府库仓三廩，输罚醵二千餘金为之，不以烦水衡。迨卧病上疏求去，得旨慰留，病已弗起，犹从卧内区尽部事，遗疏千餘言，皆国家大计，命子民表驰使上之。孟男通籍四十二年，位都正卿，市无腴产，内无羨蓄，门巷敝而不飭，萧然不异儒生，勤事以死，不忘尸谏，可谓社稷臣矣。讣闻，上赐祭四坛，赠太子太保，遣中书舍人，营葬悉如制。

张一桂，字稚圭，其先歙县人，父清始籍祥符。一桂举隆庆戊辰进士，改庶吉士。庚午授编修与修国史，壬申使持节册封德藩。万历甲戌，分校礼闈，所取皆知名士。是岁《穆庙实录》成，进升修撰，赐金绮罗衣，宴之南宫，寻补经筵展书官兼掌制诰。丁丑《世庙实录》成，进侍讲宴，赉如甲戌。寻直起居，编摩《六曹章奏》。会故相江陵张居正以父丧夺情，检讨赵用贤、编修吴中行上书论劾各得杖，谴一桂与同官赵志皋张位。李长春、田一儒习孔教于慎行，具疏论相君当守制，赵用贤、吴中行不当深罪。疏奏中官，阴报相君，相君从中刺取格不上闻，因以星变大察，志皋等各轻重降罚，一桂谢病归里。踰二年，相君卒。一桂还阙，考侍讲满，再克经筵及分修会典。甲申晋右春坊右论德，仍兼侍读，充日讲官。明年典顺天乡试，称得人。时有中贵人子弟擯不见收，而浙江□迹京兆多与选者，京兆诸生缘为飞语闻禁中，上怒，下法司问状，具以质对。有诏张一桂调南京别衙门，用调南京兵部员外郎。戊子

^①或为《授经图传》。

进南京国子司业，明年晋祭酒，明年召入为太常寺卿，仍兼祭酒，寻晋南京吏部右侍郎，逾年改北礼部右侍郎兼翰林院侍读学士，寻转左。一桂闻命就道，时业已病，行至永城卒。国制日讲官恤典不限，年资、赠谥、祭葬、恩荫皆从优厚。一桂之卒也，嗣君尧咨以例请，值当事者以同乡引嫌，仅得祭葬。一桂著作甚富，典制之文暨诗、赋、序、记、志、铭诸体若干卷，藏于家。

杨时馨，字惟德，祥符人。父月林尚餘姚县君，兄弟三人发身科第，季则时馨，举万历甲戌进士。授户部主事，丁忧起，补工部屯田司主事，理易州山厂，一切供帐悉行裁省，廉勤著声。上嘉其能，晋俸一级，寻督慈宁乾光，工成赐金绮。缮寿宫及邠哀王仙居公主管役竣，赐赉如初，晋虞衡郎中。时馨峭直清介，不能为人俯仰，尝以执法却贵珰请求，及督工程，一以节省浮费，群珰共衔之。其造邠哀王营，会有旨将临阅，群珰故毁垣冀激上怒，同事者共危之，时馨不为动。历俸八载，竟以不善姘阿外补山东按察司副使，益以风裁自持。中丞宋应昌崇信左道，奸民张君就以术媚事应昌。应昌倚任若神明，时馨面折之，失应昌意，中蜚语挂弹，章部议当调。时馨即弃官归，归一年卒。时馨性孝友，多大节，居尝憾禄弗及养，语及即泣下，喜佐亲族，交友之贫乏者倾橐与之，无少吝。没之日，橐底萧然。居官劲节，清操凛凛，一代伟人，竟以谤去官，命且弗延。士论惜之。

杨汧，字宗源，祥符人。性孝友，母卒，悲哀几绝。四世同爨，内外无间言。补郡庠生，一时声称出诸生上。镇守中官刘朗延之为其从子讲业。尝引汧至其私藏，令恣所欲取之。汧一无所领，朗大敬服。嘉靖壬午贡入太学，授安肃县训导。正身率物，遇才隽之士辄改容礼之，诸生有贫者，则出俸金以济其不及。督学陈公讲称之曰：此真后进者之楷范也。乃命总教诸庠士，熙然向化，后迁海阳王教授。比卒，安肃诸生思之，请于当道，祀于名宦祠云。

陈宁，字原安，祥符人，父赞，周府典仪。早丧母，侧室王氏抚之，宁事王如母，王卧病十七年，宁日侍床蓐供汤药，无少怠，歿则尽哀。先世资财尽散诸兄弟，授徒自给。汧中人士皆从受经术，多起家贤科，当路者莫不知有夷门陈先生。户部尚书袁洪愈、吏部尚书梁梦龙者任河南，皆延宁为子弟师，宁相接四五年，言不涉家事，两公雅重其人，举明经，分训丘县。会仲子济举进士，宁谢不仕。又三年以济贵，封陕西三原县知县文林郎，卒年七十八。郡邑诸生交诵其文学行谊，宜祀于乡，公举于督学使者，从祀乡贤祠。子济，万历甲戌进士，任陕西三原县知县，以循良卓异著声，晋户部主事。以亲老引疾归养，逮宁卒，济卒于苦次。

刘贵，字道充，祥符人。万历甲戌岁贡，官彰德府儒学训导，醇谨笃行，举不踰规矩，经术制义尤为士□所宗，执经门下者数十人，皆以文成名。居家勤俭，教子严而有法，伯子举明经，仲子举进士，称蔬食布衣，出门不具舆马，至老如一日。诸子化之，皆恂恂朴茂，卒年八十五，学者称为虚庵先生。

朱安澗，字思甫，镇平府奉国将军。笃行好古，于学无所不窥。邸第建青藜

阁，藏书数千卷，日诵读其中，极意著作，攻古文辞，海内名流皆与从游。性至孝，父曰南山公，尝病，泔剖左股以进，病良已。大司寇徐姚翁公颜其堂曰“世孝”云。博极群书，明习当世之务。晚年宗阳明之学，与海内名儒韦南荅、耿楚侗、钟文陆、涂镜源诸公相辩论，多所会悟。两台监司、郡邑诸大夫皆造庐相问，自论文考政之外一言不及私，士人益重之。晚年奉旨为宗正，群公族子弟授之经义，执经问难莫不人人解颐。又二年卒，寿八十六，所著有《理学寤言》《太极图考古本》《大学续》《谈艺录》《春草斋集》《江山览胜集》《鸥丁渔唱集》《丛桂庄诗集》《宗臣志》《宁夏定变录》《北地年表》《丛桂庄品题诗》《牡丹谱》皆行于世。

王允中，字宗尧，祥符人。少家贫，力学弗厌。嘉靖戊午举于乡，尽输其宾兴之资，置田百余亩供两尊人朝夕费，群诸弟妹收养之。授书于西华县，藉其艇脯以毕弟妹婚嫁。万历丁丑谒选，授直隶静海县教谕，三年晋令南皮县。初抵任，斋菰盟请神以清节自励，执法不避近贵，搜名田二千有奇，百姓租赋减旧额几半。南皮当九河下流，水潴而不得泄，北界沧州旧筑堤堰障水。会雨潦沧州，有贵官坐堰上，决堤没民田，允中冒雨单骑，行水中而数之，辞色俱厉。贵官气情塞其壑，境内保全。他如垦鹵田、招流移、裁驿递、稽侵冒，皆便于民。寻以治行高等晋刑部主事，历员外郎中。允中明习法律，大小必以情，部中有疑狱弗决，莫不愿就质奉命谳三晋，狱多所平反，寻晋陕西按察司副使兼参议，历任踰年，以忧归，谢绝交游，躬耕于城南楼瓦冈，经岁不一入城市。郡守肥乡宋公命学博造其庐，延为乡饮宾，始一往。督学使者新安吴公慕其高，往候之，贫不能具鸡黍。允中孝友清忠本于天性，居丧泣血三年，一禀诸礼，语及赠公及孺人，辄泣下。历官三十年，仅有田二百亩，割其半以贍弟、侄、宗人乡里之贫及婚丧弗能举者。每月朔望聚乡民，讲民圣谕及古今忠孝礼义事，乡里有行一善事即深为奖引。一夕，偶有窃者入其庐，谓允中曰：公非王清官耶？误矣。引去。卒年七十三，自志其墓。公举从入乡贤，有子永庆奉祀。

杨时宁，字子安，西山仲子。八岁受《易》于陈月湖先生，嘉靖辛酉举于乡，隆庆戊辰举进士。授山西曲沃县知县，以治行称最，晋吏部考功可主事。万历改元，新郑高文襄公为江陵所倾，一时文襄亲故居华要者皆夺其官。时宁降两淮运判，历官两浙运判、南太仆丞，稍迁兵部郎、山西按察司佥事，周历藩臬者十年，所至皆有成绩。治兵固原，值有宁忧哮拜兵变，时宁督饷决策从征有功，赐银币。寻晋佥都御史抚宁夏，时值兵燹之后，士马凋敝，乘虚阑入者多所鹵获。时宁飭厉将士，警至辄败之，先后斩获千三百馀级，驼马夷器不可胜计。晋右副都御史加兵部右侍郎，有箕口兴武之捷，以三品考满升都察院右都御史，总督宣大。宣大自互市以来二十馀年，人不知兵，时宁除器缮障，练习士卒，凡交际问馈，概行裁减，岁省军需，以佐战士，部覆宁夏两河奇捷疏，奉旨加兵部尚书，赐银币。复遇阅视，加太子少保。会西夷擒^①

^①擒，音 chōu，意思为弹拨或束紧。

众□挟加增市赏，时宁设兵守要地，相拒三月。天寒，敌食且尽，遁去。明年秩满，加太子太保。五路台吉挟索宣云旧赏，侵犯新河口，时宁疏参部将报功不实者，因失枢臣意，力求解兵柄。疏数上，诏许致仕。岁加夫米，晋太子太傅。未及行而要挟市赏者复至，人谓时宁且解兵柄，盍少徇之，时宁执不可，益严为之备，敌知难犯，遂表贡，鞍马弓矢事竣，得代还里。行李萧然，无他长物，属吏将佐餽遗一无所受。治别墅于城西，与故旧相招饮，居三年，以寿终。所著有《宁夏奏议》《督抚奏议》《三边图说》，使者计于朝，辍钟鼓一日，赠太保，谕祭十坛，遣官营葬，致赙咸如制。

田世威，宣武卫千户。骁勇，明春秋大义。嘉靖间中会武升指挥同知，以边功累官副总兵。初分守延安，有声，咨取总理马市保，升宣府游击。会大同有犯，调守紫荆关，截杀于金家井，大战五日，生擒酋长吉脱兰，命协守大同。三十四年大举入犯，调赴朔州，大战于杏园地方，斩首甚众。奏准世袭指挥使。以疾问籍，起山西副将。地方失事，参论戍永宁，隆庆五年赋声犯独石口，世威充头目哨探，至臭柳滩遇贼伏，奋勇冲战得胜而旋，总制尚书王崇古叙世威前后出边斩获功绩以闻，复职镇守三镇。万历元年卒于边。题赠都督僉事、骠骑将军，世袭指挥使如故。

杨四知，字廉风，万历甲戌进士。清畏自持，人不敢干以私，由行人晋御史按闽。闽地俗有盗，官不能问。四知至，俗为之革。寻迁北直隶学院，士人服其公明。累升大历寺卿，执法不阿，朝野咸重之。及卒，人思之，曰杨公行事盖不愧其名云。至今传诵不衰。

徐濂，祥符人。由兰阳籍中嘉靖壬子式，任平凉守。会土番入寇，公提兵力却之，军中有韩范之目。寻迁苑马卿，贤声丕著。致仕归，处家如寒素，清卓好施，乡之人薰而化者千万计。及歿，邑人士白其行于上，崇祀乡贤。

孙守业，祥符人，隆庆丁卯举于乡。任山东章丘学博，善诱人。寻迁国子监学录，历户兵吏三部司务，出授湖广辰沅兵备，驭兵民，多善政。会苗蛮犯顺，守业将所部军击破之，禽渠逆吴老跳等有功，以公举入乡贤从祀。

王惟俭，字损仲，祥符人。万历乙未进士，累迁山东巡抚。冰檠自持，节余金七万，悉以疏闻。寻授工部侍郎，三殿成，予荫一子。以直忤魏珪，郁愤而殁。赐祭葬，赠工部尚书，祀乡贤。

高节，字慎默，祥符人。万历辛丑进士，任山东寿光令，有卓绩，擢兵科给事中。忠鯁不阿。其兄讳第，以孝廉至临洮知府，多善政。卒，兄弟并祀乡贤。

宋明德，号毅谦，祥符人，万历戊子举人，任山东德州知州，以清静醇朴为治，州人化之。归家囊无长物，淡泊过儒生。年八十馀，犹夜读书，足未尝一至公室。且善于祈祷术，岁旱，上官即诣其庐敦请祈，辄雨。里人至今称焉。

马斯减，号二岑，祥符人。万历丙午举人，任山东长山县知县，廉节自守，归里后贫无以为食，日卖文自给。孝廉林宗张先生题其室曰文为活，乡人重之。

马体元，字紫素，祥符人。性孝友，母疾泣天，愿以身代。从事豫章徐匡岳先生

以道学名。万历戊戌选于乡，任山东观城令。会岁侵，饿殍载道，体元设法赈济，存活数千余人。士民勒石颂之。改任山西蔚州北直晋州，咸著声循良。比其去，民攀辕不舍。调任州，值白莲教变，饥民胁从者众。群议主剿，体元独主抚，力请于上。躬谕解散之，多所全活。侍父八十七岁，问视之节不减孺慕，有田数百亩悉令三弟平分，己不取焉。尝教子曰：子者，己之子弟者，父母之子也。闻者咸叹服。致仕归，杜门读濂洛书，所著诗文成集。及卒，祀乡贤。

常一中，祥符人，由岁贡司训罗山，邑中旧有子路问津祠，僧人易以佛像，一中力争之，得复。僧囑当道，一中以直忤去。士人为树直道先生碑。

张元佐，字子襄，祥符人。天启乙丑进士，有文名，任铨部，多所整厘，累迁兵部右侍郎。出镇昌平，以身系国安危。后积瘁告归，不越年而歿。上嘉其忠，赠兵部尚书，里人思其德，举祀乡贤。

郭文灿，字中白，祥符人。性笃孝，友亲疾，必尝药而进之。兄弟世同居，内言无间。族有贫者，婚葬咸济之。设义学，诲里子弟。崇祯戊辰举进士，任山西大同令。会年饥，民苦逋饷，售己田二千亩代为之偿。寻迁户曹主事持筹，公慎有能声，改刑部浙江司。以病归，绝迹公门。居别业，日与农圃伍，里人有谦谦君子之号。卒祀乡贤。

贾明孝，字君锡，祥符人，户部主事选之子。聪敏过人，博极群书，由明经仕为秦中宜川令，直戇不合当道，解组归来，闭户读书，都人士多从之游。年七十馀，卒，所著有《四书救微编》行世。

张士儒，号浣霞，祥符人。博瞻有雄才，知名邑庠中。天启辛酉中乡试第二，授北直隶盐山知县，以疾归。杜门嗜诗酒，著有《诗文成集》，卒，人咸传之。

郑封，号大野，祥符人。崇祯甲戌进士。事亲孝，居丧尽礼。由行人晋御史，癸未奉命按广西，有铁面之誉。甲申闻国变，家人劝其北返，封终不听，愤郁而卒。子庚锡抱父哭八日，死。粤僧人殓其尸，眷属在都者咸尽节。盖忠孝节义皆出一家云。

国朝

陈胤丛，祥符人。万历甲辰举进士，初任南京太常寺博士，升礼科给事中，转大理寺右少卿，以直忤魏珰削夺。珰收，诏复职。清朝起用补人里寺□，未几以病归。杜门教子示人上咸仰式之，以寿终。

王再兴，号少华，祥符人。家贫善事母。顺治丙戌举进士授行人，谦恭过为诸生。时家愈贫，门巷萧然，里人过而叹服。强年以疾卒，闻者悲之。

刘昌，号瀛洲，祥符人。天启乙丑举进士，授陕西三原县知县，抚民多惠政，月课士讲论不辍，丁卯试分闈，所拔多知名士。时议建权珰魏忠贤生祠地，上官意坐三原，昌力争得免，以内艰去，士民立祠祀之。服阕，补直隶元城县，举卓异考浙江道御史，帝阅卷拔科员第三，补户科给事中。疏三纠枢臣张凤翼及提督太监刘文忠纵

寇，词连辅臣温体仁，遂调外，后起废。帝阅昌疏，悔，遂赐环补吏科给事中，甫三日即劾台臣廖维义等，皆褫职。壬午典山东试，称得人，借旋汴。汴为黄水没，祸自按臣严云京掘河始，昌具疏力弹之。越明年，癸未昌至都，甲申清定鼎，以科銜授太常寺少卿，典礼乐章祀事，有条议，迁太仆寺卿，多所清厘。时民苦徭马，昌议折价，直隶山东皆便之。升工部右侍郎，寻迁左。值上亲政，覃恩加太子太保、都察院左都御史，因得封三代，荫子升工部尚书，有修河修城，暨清察钱粮疏，上嘉纳。会乾清宫成，赐马及金缎，调刑部尚书，力辞，上慰留。持法多平允，屡进少傅兼太子太傅，请假迁葬兼营妻一品夫人朱氏莹，上予祭一金五百。假满补工部尚书，力疾视事，屡乞休，情词迫切，上询辅臣者再，知不可留，下温旨褒嘉。复荫子，许驰驿归。居家清俭如寒素，杜门躬课子。邑有利弊事力代民白，乡人歌其德。士之有品望者多从之游，岁时寿期，三原、元城人尚有至其家者。

王植，字培之，祥符人，由拔贡授北直通州州守。甫四月即弃官归，因题诗于署曰：四月服官血尽呕，茫茫潞水付东流。十人未竟七年事，始信繁难第一州。居家恬朴有古风，人高之。

孝友

孝友，庸行也。终身所不能尽，亦终身所不可名者。奚志乎？然无以志之，非所以为励矣。祥邑土沃，人淳由粟，姜被之风盖有存，独割股一事，明太祖听其所为，不在旌表之例，盖以为孝之异端，不可为训也。其旧志所载，不敢擅删，今则概无取焉。作孝友志。

唐

张士严，其事无所考，旧志有，姑存之。

宋

张遇仁，开封人，四世同居。

元

杜佑，河南行省署为三司及水、马驿提领，父成病于家，佑忽心惊，举体沾汗，即弃职归。父病殆，遂祷神求代，且尝粪以验疾。父卒，庐墓尽哀，有驯兔之瑞。人以为孝感云。

陈善，事亲以笃孝，称复其家。

明

丘铎，字文振，祥符人。师事刘基，至正末避地四明，及江南皆归职方，弟钧为

会稽巡检，奉母同之官。未几母病，铎昼夜泣祷，乞以身代。母歿，哀恸几绝，卜葬于鸣凤山下。结庐墓侧，朝夕悲号，其地多虎，闻铎哭声皆避去，人称为真孝子。宋濂传其事。

陈铠，祥符人。妻死，矢不复娶。父遘痿疾，十馀年躬执爨，亲调汤药，朝夕无少懈。反卒，哀毁骨立，季父老而无子，铠请同居，侍养如父母。成化十八年诏旌表。

岳仲明，宋鄂王七世孙，祖居固始，洪武初徙家于汴。仲明少立清节，隐居不仕，亲丧庐墓九年，有司举孝廉，三召不起，赐号纯孝先生。所著有《遗安集》藏于家。

翟聚，性至孝，尝割股以愈母病。洪武二十年，以孝廉举授行人，母没，庐墓哀毁踰礼，终直隶临淮县丞，有司表扬之。

朱安河，字应清，镇平府镇国将军。性至孝，母贾夫人病，割股以进，复尝溷以验差否。及卒，哀毁骨立，疏食终三年。迨父病，一如所以侍母，父病差，有鸟数千翎于庭，人以为孝感所致。事闻，上遣中书赐玺书。及卒，复敕建崇孝祠以旌焉。

陆清，字汝清，祥符人。性至孝，父母有疾，侍榻朝夕弗离，药餌非亲尝不进，及没，庐墓终丧，以过哀瞽其右目，致有白兔之瑞。后以贡生任邹平县儒学训导，嘉靖中旌表。

刘允行，少丧父，母郭氏年二十九纺绩养姑，姑没，鬻衣珥祭葬，守节五十年。郭时疾，亟思食肉，允行割股以奉乃愈。后患疽，药罔效，奉侍益诚，尝糞甘苦以为欣戚，有司以节孝旌其门。

刘辉，字文华，祥符人。行端学博，尤精于医，与弟焯同居六十年，友爱无间，有司闻其贤，聘为乡社师。□□为以存诚为主，弟子多以其学显一时，名士争与之游，李献吉尤重之。

朱安汨，字公治，新会恭简王介子，受镇国将军，封母李氏为恭简王媵姬。汨生七年，恭简王薨。又数年，汨出府，不分一钱，僦屋以居。迨受封，则以勤俭治生，稍稍丰足，日奉甘旨供李欢。李病卒，哀毁瘠甚，援母以子贵之例奏于朝，追封李为一品夫人，赐祭葬悉如制。汨竟以悲哀成病，歿于苫次。

李鸾，母疾笃，药罔效，鸾割股进而愈。巡抚李永复其家，得诏旌表。

吴栋，父病，割股肉进父，病愈。

王宾，父德病危，割左股为羹以进，乃再生。

庞庆，父教有疾，庆割股为羹得愈。

张进孝，父病割股。

刘□中，母宋氏病，割股以进母，食之即愈。

刘光大，父患眼疾，光大将左膊咬肉烹之，父目再明。

朱睦槽，河阴府宗室。母潘氏病危，割股奉食随愈。

萧文登，母朱氏有疾，医治不效，割股进食而愈。

邹元，父及孟病伤寒，服药罔效，元割股进食遂愈。

张一淮，母刘氏病，割股进食而愈。

白恩，父奉疾，割股和羹食即愈。

朱勤履，镇平府辅国中尉，父睦梓病，医者束手。履割股治羹进，父遂愈。

朱朝印，汝阳府宗室，母病笃，割股奉即生。

朱勤燾，胙城府宗室，父病割股，疾愈。

牛进忠，母病危，进忠割左股肉以进，病瘥。

王朝，母病危，朝割股奉食，病愈。

李斌，母卒，庐墓事闻，诏旌其门。

史经，周府仪宾，母卒庐墓三年，诏旌其门。

张凤，父凯失明，凤事父能孝，及父卒，捐产营葬。后母朱氏故，哀毁，庐墓三年。丧妻不娶。祖让至凤五世同居。

郑官，父病没，昼夜哭泣，不离柩侧。既葬，庐于墓，朝夕上食，包土成冢。

郭廷用，生员。母胡氏病竭，诚医祷病愈。父卒，哀毁不食，及母卒，合葬，负土成坟，守墓三年。

张亮，母王氏病故，庐墓三年。

杨儒，母周氏病故，庐墓三年。

袁隆，丧母，庐墓。隆死，子尚化，亦庐墓。

万年，朱仙镇保人。母王氏卒，庐墓三年。

朱睦梁，镇平府镇国中尉，宗正安胤子，母贾淑人歿，庐墓三年，抚按具奏旌表。

常惺，字季默，举人。父病试药尝粪，及父卒，庐墓三年。

义志

唐

格辅元，浚仪人，希元之弟。举明经。武后时累迁御史中丞、凤阁鸾台同平章事，会凤阁舍人张嘉福等请立武承嗣为皇太子，辅元与文昌右相棘阳岑长倩谓皇嗣在东宫，不书奏，大忤诸武意，来俊臣胁诬辅元与长倩谋反，俱斩之。子遵举明经，为太常寺太祝，亡命中年十馀年。中宗即位，遵诉父冤状，擢为赞善大夫。

五代

张延朗，浚仪人，□唐为粮料使，累迁吏部尚书兼中书门下平章事判三司。晋高祖有异志，三司财货在太原者，延朗悉调取之，高祖以为深恨。及晋兵入京口，延朗遂遇害。

宋

任福，字祐之，开封人。咸平中补卫士，累官环庆路副总管，知庆州，以破元昊功拜神龙卫四厢都指挥使。会元昊复入寇，福力战，身被十馀矢，有小校刘进者劝福自免。福曰：吾为大将，兵败，以死报国尔。挥四面铁简，挺身决斗而死。子怀亮亦死之。诏赠福武胜军节度使，录其子及从子凡六人。

王珪，开封人。善骑射，累官殿前第一押班。元昊寇镇戎军，珪从任福连战三日，诸将皆败，福陷围中。珪复深入贼，劈杀数十百人，所用铁鞭、杵皆挠曲，手掌尽裂，夺击自若，目中矢乃还。卒赠金州观察使。

刘平，字士衡，祥符人。乾兴中为鄜延路副总管。时元昊寇延州，平帅师与石元孙合兵往援，与贼大战。敌复蔽盾为阵，平击却之，夺盾，杀获及溺水死者千馀人。平左耳右颈中流矢。薄暮，敌复以轻骑战，平退保西南山，立栅自固。三日敌兵四出合击，绝官军为二，遂与元孙皆被执死之。赠朔方军节度使兼侍中，谥壮武。

郭遵，开封人。世隶军籍，迁殿前指挥使，累官延州西路都巡检使。元昊寇延州，出骁将杨言当遵，遵挥铁杵破其脑，复持铁枪进，所向披靡，深入敌中，敌攒兵射之，中遵马，马仆，被杀。赠果州团练使。子四，仁宗皆为赐名，曰：忠嗣、忠绍、忠裔、忠绪，俱拜近侍官。

孙节，开封人。以才勇补右禁，侍从狄青有功。青之讨侬智高也，以节为前锋，遇贼于归仁铺，中枪而没。特赠忠武军节度留后。

郭恩，开封人。累官秦陇路兵马钤辖。嘉祐中，夏人入寇卧牛峰，恩与力战，被执，不屈自杀。赠同州观察使。

安抚，开封人，煮子。靖康时为给事中，金人寇，死之。

郭僎，字同升，祥符人。以父任调东海县尉，历迁通判全州，权浮梁宰，未行。会贼张顶已逼县境，众止之。僎曰：安逸则就，艰危则辞，非吾所学。竟至县，约束吏卒，誓以死战。贼闻之，伪降。既入邑为变，邑官窜伏，僎曰：吾为宰，义不可去。端坐公署，贼徒责僎，大骂不绝口，遂遇害。诏赠承议郎，录其后二人。

张克戡，字德祥，耆之曾孙。举进士，徽宗时累官知汾州，金人攻汾，克戡毕力捍御，谕其民曰：吾不忍负国家、辱祖父，愿与此城终始，以明吾节。众皆泣曰：愿尽死听命。虽屡却敌，而援兵不至。及城陷，犹率众巷战，金人欲生致之。克戡归索训服，南向拜讫，遂自引决，一家死者八人。事闻，谥赠延康殿学士，追谥忠愍。

程迪，字惠老，开封人。父博古，部鄜延兵战死。迪以荫受官。宣和中，从杨惟中征方腊有功，累迁荣州团练使。时金人入寇，诏以迪提举永兴路军马，措置民兵。及永兴破，迪率其徒努力与斗，愤怒大呼，口流血，士皆感奋。持短兵接战数十合，身被创几遍，绝而复苏，犹厉声叱战不已，遂死之。诏赠明州观察使，谥曰忠愍。

吕由诚，字子明，晦之季子。幼明爽有志略，以荫补官，后通判成都府，知雅、

嘉、温、绵四州，皆有治绩。靖康初，徙知襄庆府。时群盗蜂起，崎岖至郡。金兵来攻，由诚与判官赵令佳同心誓守城，俱被执，不屈死之。

李震，汴人。靖康初，金人迫京师，震时为小校，率所部三百人出战，杀人马七百餘。已而被执，骂不绝口，遂被害。

向子韶，字和卿，开封人，敏中之从孙。举进士，累官东京转运使。时属郡郭奉世进万缗羨餘，户部请赏之以劝天下。子韶奏言，近臣首开聚敛之端，渐不可长，士论韪之。高宗时出知淮宁府，金人犯城，子韶亲擐甲胄，率诸弟誓以死守。仍遣人赴宗泽求援兵，未至而城陷。子韶为贼所执，不屈，阖门皆遇害。赠通议大夫，谥忠毅。

赵士隆，祥符人。天圣中为邠宁环庆路都监，与贼大战而死。录其子滋。

张叔夜，字稽仲，开封人。靖康初以延康殿学士，知邓州。四道置帅，叔夜领南道都总管。金兵再至，钦宗手札趋入卫。叔夜即自将中军，其子伯奋将前军，仲熊将后军，合三万人，与贼大战，斩金环贵将二人。帝遣使赉蜡书以褒宠。及城陷，叔夜被创犹力战。至白沟，御者曰：过界河矣。叔夜矍然而起，仰天大痛，遂卒。赠开封仪同三司，谥忠文。

何灌，字仲源，祥符人。武选进士，累官河东、河北制置副使。靖康初金师寇京师，灌入援守京城西北隅，拒战三日，被创没于阵。子蓊，阁门宣赞舍人，从父战亦死之。绍兴中，赠灌忠正军承宣使。

高贵，祥符人。寓居镇江，举进士，累官知高邮府，扈从之海上，擢枢密使，与陆秀夫同死崖山。

元

陈祖仁，字子山，汴人。好学，有文名。至正初举进士第一，累官翰林学士，除参知政事，朝廷之事多所匡正。及顺帝北遁，祖仁为乱军所杀。

韩因，字可宗，汴人。负气不群。盗据汝宁，官军讨之，久不下。会朝廷诏赦叛逆，募可持诏入贼者，因应命。乃假以唐州判官，使焉。贼渠恐，纳诏不读，纵因归报。因出，乘马周贼屯，大言曰：汝辈良民，何不早归田里，甘从道贼驱使耶？贼渠闻之，追因，责其所言。因极口肆詈，贼怒，遂被害。

明

王良，字文信，祥符人。革除间累官刑部侍郎，出为浙江肃政按察使。闻靖难师入京，恸哭。会文皇遣使召之，良语其妻曰：吾生平以忠义自许，今事至矣，乃索火，衣冠端坐自焚死。妻先投池中而死，见列女志。

马振，宣武卫指挥。祖俊父义皆死于战。正德中，流贼作乱，振率众讨之，至湖广应山县大战而死。事闻，诏建世忠坊以旌焉。

李惠，字德卿，祥符人。兵部尚书钺之子，正德丁丑进士，授行人。车驾将南幸，惠抗疏谏止，上怒杖之，卒。嘉靖初赠监察御史。子升以荫仕至姚安知府。

王正志，字淑明。黄县令中逵子，举万历戊戌进士，授陕西富平县知县。其为治右善锄强，邑中权贵及大猾皆心慑不敢犯。会矿税役兴，中使乘传四出，为虐关中。中使梁永视诸省残暴尤甚，富平部中亡赖子弟及富民怨家多附永，煽吓富民，夺财产，榜笞热刺，发屋椎埋，百姓不能保朝夕。正志捕部民从永为奸者，收治之。奸民亦阴恃县事以求中，永怒，正志乃具疏列永贪虐状，永亦诬奏正志阻挠矿税，有旨逮械至京，榜之数十，系北寺狱。正志耻群书读不辍，著有定性诸书，系三年卒。正志性孤介，家世清贫，为孝廉时郡中有豪家坐法，郡守蕲州刘公欲宽之，令持资谒，正志卒不受。人有过，面折亡所容。读书至忠臣烈士即泣下，私心向之，竟以是及祸。

张纶，字大经，祥符人。通《春秋》，补开封府学生员。嗜酒负气，好与人决不平。正德间恶瑄廖堂镇河南，堂弟鹏以媚事逆瑾，得锦衣卫指挥，肆行残虐。纶密疏鹏诸不法事，将赴阙讦奏。鹏持金诣纶求解，纶斥之。鹏诬以他事下狱，纶大骂不屈。鹏乃大杖箠之，桁杨立于市，晒狱卒马玉杀之。死日见梦于母曰：儿为鹏杀矣，当请于帝也。死三日，马玉昼见纶，立死，世庙改元，鹏与子铠皆诛。

都任，字宏若，祥符人。万历癸丑进士，由南兵部武选司主事，累迁陕西左布政使，备兵榆林，驭军抚民，多善政。会闯贼破长安，所至风靡，公膺孤城固守之。贼持伪谕来，公焚而梟其人。夜勒兵入，贼垒斩毁无算，贼败去。贼祖冢在任辖邑，任发之毁，蛇一、蚁数斗，贼大举众围城，遂遇害。

张坚，府庠生。值寇攻城，矢石不能御。坚献悬楼式以击之，昼夜站垛，积瘁死。

夏世英，号剑斗，祥符人。明经任商丘学教谕，闯寇攻归德，城破，英持刃骂贼，死于明伦堂。东妻石氏遂自缢，见列女志。

李春贵，汴人。游击忠勇。闯寇犯汴，春^①单骑奋往。酣战逾时，贼死伤无算。右腕中矢，恐为贼执，遂刎。

王有根，庠生。乡宦之玺子。闯寇二次攻汴，根督义勇社直入寇营，中箭而殒，官瘞之。

陈宗、朱梁、魏都、白亮采，俱汴将，闯寇攻城皆战死。

阮泰，字熙阳，尉氏籍祥符人。由开封府学贡监授山西大同府广灵县知县。多有政绩。时值甲申闯寇之变，泰衣冠向神京痛哭，叩拜绝食而卒，后祀乡贤。妻朱氏随夫同死难，事见列女志。

史可法，字道林，祥符人，祖居城西狼城岗。崇禎戊辰举进士，累迁总漕都御史。多惠政而风纪凜然，民爱且畏。明末乙酉以大学士兼兵部尚书出镇扬州，城破死

①原刻疑缺字，应为春贵。

之。遗有《乞骸骨葬钟山书》，读者莫不流涕。

国朝

杨矿，字泗水，汴人。官生任襄阳知府。值总兵王光思叛。矿被执，负义不屈，遂被害。

高元美，字君实，祥符人。功贡生历任兖州府黄河同知。岁戊子，山东李贼陷曹邑，贼逼从，立志不辱，骂贼而死。

隐逸

《易》云：天地闭，贤人隐。论其时也，抑思唐尧在上，颍水箕山徜徉自乐者，果何为哉？不惟其时，实惟其志矣。汴自夷门监者而外，代不乏人，泉石膏肓即其矫枉过中乎？然而独行其志，起懦廉顽，犹禽于藉终南山为捷径者矣。作隐逸志。

汉

符融，字伟明，浚仪人。师事少府李膺，善谈辩。州郡礼请举孝廉，公府连辟皆不应。会以党事遭禁锢，妻亡，贫无殓斂，乡人欲为具棺服，融不肯受。曰：古之亡者，弃之中野，唯妻子可以行志，但即土埋藏而已。同郡田盛亦知名，优游不仕，并以寿终。

晋

董养，字仲道，陈留浚仪人也。泰始初，到洛下，不干禄求荣。及杨后废，养因游太学，升堂叹曰：建斯堂也，将何以为乎？每览国家赦书，谋反大逆皆赦，惟杀祖父母、父母不赦者，以为王决所不容也。奈何公卿处议，文饰礼典，以至此乎！人理既灭，大乱作矣。因著《无化论》以非之。永嘉中，洛城东北步广里中地陷，有二鹅出焉，其苍者飞去，白者不能飞。养闻叹曰：昔周所盟会狄泉，即此地也。今有二鹅，苍者胡象，白者国家之象，其可尽言乎！顾谓谢鲲、阮孚曰：《易》称知几其神，君等可深藏矣。乃与妻荷担入蜀，莫知所终。

南北朝

白履谦，浚仪人。博通经史，居古大梁城，时号梁丘子。景云中召为校书郎，弃官去。开元中召赴京师，辞病老不任职。诏拜朝散大夫，乞还，手诏许游京师徐返里间，谦留数月乃去。

明

张清，字澄甫，其先新都人。长身玉立，博涉经史而隐于贾，客游大梁遂家焉。

慷慨重然诺，与物无竞。人有负子钱，贫不能偿，辄折券不复问。见困穷孤独者，倾囊助之。故人汪谋馆于大梁，以金三百寄清，未几，汪死，逆旅人无知者。清召其子归之金，封识宛然，里人益高其行。卒葬大梁门外，里人呼为张隐君墓云。

张民表，字林宗，其先中牟人，居祥符。弱冠举于乡，隐居不仕。工古文辞，以草书名天下。筑圃满植菊，日对吟啸。行事率超宕有晋人风，所著诗累屋，稿悉付壬午水中。门人周亮工得之，传诵者梓行于世。

朱濂，字澹轩，祥符人。岁进士，隐居不仕。性狷索，对妻子不苟顰笑。与友人课大梁书院，途遇由通趋去，濂行自如，群号为圣人。弟子日进多有贵显者。

赵乔星，字养明。负性颖异，弱冠入庠，其意致即不在尘嚣中，以戴记授生徒。官保刘公昌出其门下，年逾七十犹晨夕讲学不倦，咸称为道隐先生。

国朝

刘承胤，明世挥使。三中武科，累升山东副总兵，以城守功加都督同知。改物后，偕弟参将承训种瓜三里冈，足绝迹城市，盖近古东陵也。

张壮行，字心孟，祥符人。以诗魁明天启甲子榜，性恬退，不乐仕进。所居不蔽风雨，薪水之需皆自操焉，时敲棋吹箫自娱，上官高之，延为乡饮宾。

魏履征，字太衡，祥符人。性忠朴，不事浮饰，四中乡乙榜，以明经授州判，不就。教生徒过百人中多登第者。年已耄，不废诵读。士人以真君子称之。

侯应元，字魁南，祥符人。为邑庠生，性恬退，无竞志，善居乡，乡人服其德教。孙朴成进士，犹日与农圃伍，有司心折之，与乡饮。

列女

天地正气存于戴三加之冠者，亦难其人矣，况笄黛者乎？汴为礼乐浸濡地，或以孝传，或以节著。而寇江兵变，蹈刃如饴，足以光彤管，而馨女史者正不乏也。昔人以巾帼遗人，谓其非丈夫也，使丈夫而尽如此巾帼也，吾为国运幸，吾为世风幸矣。作列女志。

唐

李氏，汴人，年八岁父亡，殡于堂十年，朝夕哀临。及笄，母欲嫁之，断升乞终养。母丧哀号过人，自庀葬具，州里送葬千余人，庐于墓，蓬头跣足而负土，以完园塋，蒔松四百。武后时，旌其门闾。

董德真，浚仪人，为贾直言妻。直言坐事，贬岭南，以妻少，乃诀曰：生死不可期，吾去，可亟嫁无须也。德真不答，引绳束发，封以帛，使直言署曰：非君手不解。直言贬二十年乃还，署帛宛然，及汤沐，发堕无馀。

宋

永泰县主，太祖从孙女，性孝敬，动循女诫。年十四，归元班殿直梁子才。克执妇道，事舅姑孝谨。子才亡，时永泰年二十二，哀毁几陨。诸族欲夺志，永泰以节自誓，终身不渝。初封共康郡君，元封中加今封，以褒荣之。

朱氏，开封民妇。夫日与侠少饮博，犯法徙武昌。父母欲夺而嫁之。其夫将行，一夕朱自缢死，且曰：及吾夫未去，使知我不为不义屈也。吴充时为开封判官，作《阿朱诗》以记其事。

倪氏，孟志刚妻，祥符人。志刚家贫，无子。志刚病死，倪氏令匠宽其棺。是夕，祭其夫，自缢死。

元

李氏，丁尚贤妻，汴人。年二十餘，有容色。至正中，贼至，欲虏之。李怒曰：吾家六世义门，安能从贼以辱身乎？阖门三百餘皆遇害。

明

王良妻□氏，祥符人。建文时，良为浙江肃政按察使，文皇靖难师入京，召良。良语妻曰：吾平日以忠义自许，今事至矣，汝意如何？妻慨然曰：大丈夫见义勇为。何谋及妇人？公能为忠臣，我独不能为义妇乎？良自焚，而妻已先投池中矣。

贞烈妃张氏，祥符人，为罗山恭悼王妃。宣德中王薨，妃自殉，事闻，赐谥贞烈。

时氏，魏安仁妻，祥符人。安仁举进士，为给事中，谪翁源县典史，卒于官。时年二十三，事舅姑甚谨，日以女工易甘肯。母家素饶，时有馈遗，悉却之，曰：以养舅姑而累亲，吾不愿也。宣德中旌表。

史氏女，祥符人。年十五，许胥氏子，未娶而死。女闻，白父母往吊之。至则遂服其丧。及暮，父母欲载之归，女曰：夫舅姑何以为养？竟终于胥氏之室。宣德中旌表。

贞烈妃巩氏，祥符人，周宪王妃。正统初，王薨，妃自经。上嘉其行，赐谥贞烈。时夫人牛、戴、韩、欧、陈、李六人同日死节，俱谥贞顺，附葬宪园。

左氏，周简王姬媵，祥符人。景泰中，王薨。左即自缢于室，中外莫不悲之。

陈烈女，祥符人。年十八聘杨瑄，无何瑄卒，女痛哭欲往吊之，父母不许。女乃剪发属媒氏致之，瑄母以定婚帖裹其发置瑄怀中，葬焉。父母谋改聘，女缢而死。后五十二年，瑄侄永康改葬瑄，而求陈氏骨合焉，二骨朽矣，发与定婚帖独鲜。完葬三年，有岐谷丫瓜产于墓。

蔡氏，内乡王夫人，祥符人。王未袭爵，夫人亦未受妃封。天顺末，王薨，夫人

即自缢死。事闻，上嘉其节，遣使以祭焉。

杨氏，黄士谦妻。年二十，士谦卒，自缢死。

刘氏，燕从义妻。夫卒，守节。事闻旌表。

杨氏，黄大妻。夫病，笃语杨曰：汝年少，善事后人。杨泣曰：既为汝妻，安得再嫁？黄卒，杨亦自缢。

于氏，周懿正媵姬，得幸于王，生子同锵。王薨，于有身六月。于抱孤于怀，拊膺大恸。口吾以一死报王，天若悯予，惟孺子是救。遂自缢于西宫。后子同锵封新会郡王。

高氏，夏永昌妻，祥符人。娶三月而永昌死，高欲从之，家人防之甚严。则日至主前焚香，窃祝曰：永昌俟我。其母知之，泣谓之曰：汝今十九年耳，奈何轻死？高氏曰：嗟母谓百年永耶，然均死耳。竟自缢死。

刘氏，耿英妻。夫卒，守节。弘治末旌表。

刘氏，魏相妻。相死，刘即欲殉，祖姑王乃与同寝哭之，达旦给其祖姑曰：我渴甚。祖姑往取水，遂自缢。时年二十一。

王氏，孙林妻。林死，王潜诣园树自缢死。

张氏，田孝子妻，祥符人。孝子名锐，尝刲股疗母病。母死庐墓三年，于是称田孝子。云孝子有甥宿舅肆中，而夜杀其邻，肆客盗其财，因逮孝子狱，亡何孝子死，出其尸，墙为之崩。张氏哭曰：我与锐夫妇二十年矣，彼能为孝子，我独不能为节妇耶？遂自缢。

张氏，李杰妻，祥符人。年十八归杰，踰年而夫病且死，握其手诀曰：我死汝必更适善待后人。妻泣矢之曰：君死妾死，不愿更也。杰死张氏谓梓人曰：棺大之，夫性喜宽大也。其父母曰：棺第狭之，勿大。梓人为狭其棺，张氏哭毁其棺，曰：不大不棺也。棺成，自缢而死，遂同棺而葬。

张氏，柳金妻，祥符人，居通许。年三十而金死，自誓不更嫁。同邑有谷姓者，谋娶之。金兄玉利其产，许之。诈称张母病，召归，至途中乃觉，即裂其衣欲缢，而卫者甚严。张既至，谷欲犯之，张唾其面曰：我家虽微，岂从汝为狗彘之行哉？谷惭，鞭之数百，竟不从，至旦而死。

吕氏，杨能妻，祥符人。夫卒守节，嘉靖十七年旌表。

张氏，陆濩妻。年二十四，濩死，无子，张守节不二，以侄继夫之后，抚育甚悉。孀居四十五年。嘉靖二十四年，事闻，诏旌表。

周氏，王茂才妻，祥符人。夫卒自缢。嘉靖二十五年旌表。

马氏，蔡铨妻，祥符人。铨举进士，仕为行人而卒。铨素廉介，家贫甚，马时年三十有一，乃治女红以为食，誓不易志。后侄珮迎养于家，守节五十余年卒。嘉靖初旌表。

郑氏，黄思妻，夫卒守节，嘉靖二十五年旌表。

尚氏，钟秩妻。秩死，尚年十九，自誓守节终身。

刘氏，汝宁端恪王官人，祥符人。嘉靖间王病，刘祷神祈以身代，及王薨，刘具素衣哭告于王，自缢死，事闻旌表。

楚氏，镇平府奉国中尉朝咭安人，祥符人。生之夕，其母梦烈日中雨雪，比长从其兄。受《孝经》《论语》。选配朝咭，受封安人。咭疾革，安人以死自誓，乃以簪珥绮衣进其姑，其他尽颁诸侍人。咭气未绝，安人先自缢死。

田氏，张明德妻。夫卒，姑年六十有六，三子俱幼。田绩纺奉姑抚孤成立，守节四十余年，子禄登甲辰进士，以子贵，封太安人。事闻旌表。

张氏，千户田浩妻。浩病，故守节五十九年。奉侧旌表。

路氏，汝阳王府镇国中尉睦棹妻，封恭人。中尉卒，守节五十九年。两院奏准旌表。

刘氏，张鹤妻。年二十五，鹤卒。子守中甫三岁，苦节抚孤，孀居五十余年。事闻旌表。

王氏，沈相妻，祥符人。相故，王年三十有六，遗孤方四月，纺绩教子，守节五十余年。事闻旌表。

孟氏，生员司邦谟妻。谟病故，孟即不食，后夫十一日而卒。事闻旌表。

王氏，史泰妻。姑任氏病，王刲股以进，姑病寻愈。

史氏，何鸣朝妻，祥符人。良医史仕女，归鸣朝三年，举一子献图。鸣朝寻卒。史氏年十九，家贫甚，翁姑具在。史氏秉节抚孤，纺绩以供翁姑，养四十余年如一日。事闻旌表，以献图贵，赠太宜人。

丁氏、宋氏，临安府知府牛可麟妾。可麟卒，丁、宋俱不食死。

何氏，富平县知县王正志妾，祥符人。正志与恶当执，奏逮死诏狱。何氏闻讣，自缢死。

朱氏，镇平府镇国中尉睦果女。年十六，嫁祥符县民李从谦。夫亡，年方二十，有一男仅周岁。欲死以殉，婶母劝解以亲老子幼，朱勉存。守节五十余年，御史杨具题旌表。

阎氏，袁永嘉妻。夫卒，阎不食，至二十四日死。

陈氏，田文见妻。田卒陈年十九，不食，九日死。

王氏，李士魁妻。夫故，自缢死。

朱氏，生员俦士选妻。士选卒，朱后五日缢死。

赵氏，高维嵩妻。嵩故，赵不食，十二日卒。

刘氏，李愬妻。愬故，刘氏年二十，守节五十余年，无按旌表。

张氏，方继典妻。年二十，继典故，无嗣，立族子世选为嗣，守节二十余年卒。

李氏，吴道立妻。道立卒，李守节四十余年，寿七十卒，提学副使袁贞吉旌之。

王氏，汝阳府奉国将军睦樛淑人。樛卒，王守节四十余年。

钱氏，李知妻。知卒，钱守节五十余年，有司旌其门。

郑氏，御史郑封女、朱光普妻。从父宦京师，值甲申变，抱未周岁女投御河死。氏婢朱氏，封弟逵妻也，抱幼子追之，亦投河死。人传为双节。

张氏，朱道行妻。年二十，夫逝，抚幼子备尝诸苦，住汴东北角桥。尝戴笠夏耘。会刘扁子乱，被执欲辱之，骂贼遇害。

刘氏，乡宦刘不息女，邑庠生张名世妻。夫亡，年十九，抚一女，守节终身。

范氏，邑庠生范一鹑女，适朱姓，逸其名。适未一载，朱死，氏年十八，屡投缯，家人解之。后朱殡出，氏以头叩棺气绝，同穴葬之，闻者莫不悲悼。

焦氏，童生刘尔馥妻。寇围汴人，夫缢城采草食，中矢死。氏闻遂自缢。

卢氏，梁天才妻。壬午河决入汴，夫妇乘筏北渡至仁和门遇贼船，执夫妇登城欲污。氏给之曰：幸逐夫去。贼逐之，氏见夫去，随投城下水死。

李氏，祥符人，医官具鹤鸣妻。生事姑惟谨，夫逝，氏年三十，抚三子，成人皆孝。寿八十八终，有司扁。

石氏，夏世英妻。从夫任归德府学博，遇流寇破城，自缢死。

赵氏，廩贡刘梦丙妻。事公姑以孝闻。年二十五，夫亡守节。丸熊教子，昌成进士，官至官保。尚书敕建坊旌表。

秦氏，刘从弼妻。夫歿，氏年二十二，守志自誓。随侍祖姑杨氏、婢姑王氏，三孀同居。时翁耄子幼，克全孝道，抚子成立。苦节四十一年，年六十三岁，崇禎年有旨建坊旌表。

朱氏，祥符人。广灵知县阮泰妻，与夫同死甲申难。

国朝

郭氏，许国朝妻。二十九岁夫故，氏不愿生。欲投缯，家人阻之。守节四十破城年，抚四子成立，一子康备弟子员，年七十七。

王氏，举人张祥升妻。升状病，入戊子闱，及发榜捷音至，逾时气绝。王时随祥升父任陕，闻讣，遂投衙内井死，水香三日，陕抚按会题其事。

赵氏，邑庠生赵文蔚女，刘芳美妻。年二十九岁夫死，誓守节。家人以无子故劝之嫁，不听也。纺绩以事翁姑，人传其贞孝。

刘氏，李吐花妻，庠生李口品母。年十九而寡，子三岁，不食者七日，誓以死殉。翁姑力劝之，复食。事翁姑死，葬尽礼，苦节五十破城年，乡里公举府县旌其门。

康氏，祥符人，刘大本妻。侍翁姑曲尽其孝，爱幼叔过己子。尝劝夫不与人争，乡里称贤妇。

张氏，袁翰林檐如孺人。甲申之变，□^①姑抱子避兵，遇寇，驱逼不从，项受两

①原刻不清晰，疑为“扶”。

刃气垂绝。檐如夜觅救苏，创经年而始合。今□痕犹累累环颈也，始终无恙。子已入庠，人服其苦烈。

王氏，祥符人，姚有宝妻，姚维旺母。幼奉公姑，孝行重于间里，及经流离，守节弗渝。各道本县扁奖。

刘氏，十八岁孀于守节，今至八旬，教子王丹兴登丙戌科进士，当道扁奖。

孙氏，于敬妻。敬死守节终身，有司旌其门。

牛氏，石梦全妻。二十五岁守节，善抚子，有司公旌。

陈氏，赵文举妻。夫死自缢，县扁其门，曰誓死从夫。

薛氏，邑庠学生高日厚妻，明经献丰薛公女。年二十一岁，夫故守节，事翁姑孝抚幼子，艰辛备尝始终如一。

李氏，茂才刘梦奎妻。夫故，氏年二十八岁，守节，侍姑张氏甚谨，以节孝名。

马氏，李世科妻。年二十七夫死，守节终身。

薛氏，邑庠生员刘逢源妻。年十九，源死。氏誓志守节，历二十年如一。

鹿氏，宋守强妻。姑病，氏刲股而痊，旌以孝感。

王烈女者，乳名秀女，父王碧，祥符人，以秀女字于之瑞子天祥为继室，未婚也。秀女娴书史大义，庄孝勤恪。迨天祥病歿，父母知秀女至性，匿其计，不使闻，将期而嘿议媒妁。秀女始知之，即一恸几绝，决意躬唁于夫灵，父母不能止，随往天祥所。陈聘颺踊，初绝水粒，父母公姑知其志，曲防而苦饲之。其日为天祥小祥，又一期皆母与姑互防之周也。一日闻天祥前室有遗孤子轺无乳，而乞养于至戚，秀女欲归子自抚之。彼戚方怜爱，视为子嗣，坚不能夺计。其日又适大祥，秀女早起膳糗芻洁酒饌，列祭痛哭，终日不食，姑仍伴寝稍懈。午夜秀女起而自经焉，不貳之义信矢靡它烈节，自裁一死如寄，年甫十七也。祥符令浙钱唐沈叙廉其事，通详于郡道司院。时辽阳佟公为抚军，核实而闻于朝，下部一再覈，国人见闻，无异辞。会至尊首敦风教，特允给官帑三十金建烈女坊于里门以旌之，曰为故民于天祥未婚妻烈女王氏立此。康熙十三年甲寅岁十二月初三日奉旨也。

游寓

邑故大梁墟也。魏罍招贤，子輿氏尝税驾焉。其后为东京，又为五代赵宋定鼎地，至今犹俨然一大都会矣。四方名人硕士或宦游兹土而因以家成，定交上国而不忍去。邑多长者迹，是亦与有荣施也。地以人重，岂尽在生长于斯者哉。作游寓志。

周

孟轲，邹人。受业子思之门人，道既通游事齐宣王，宣王不能用。梁惠王三十五

年，王卑礼厚币以招贤者。轲至梁，王曰寡人不佞兵，三折于外，以羞先君宗庙，甚丑之，叟不远千里辱敝邑之廷，将何以利吾国。轲曰：君不可以言利，上下争利，则国危，亦有仁义而已矣，何以利为。

淳于髡，齐人。滑稽多辨。梁惠王三十五年至梁，王与语三日夜，欲待以卿相之位，因谢去。

汉

邹阳，齐人事吴。吴王濞有异谋，阳上书谏，不听。适梁，从孝王游，介于羊胜公孙诡之间。胜等嫉阳，恶之孝王，下阳狱，阳客游以谗见系，恐死而负累，乃从狱中上书孝王。出之，以辞赋鸣于梁，为上客。

枚乘，字叔，淮阴人。为吴王濞郎中。吴王有邪谋，乘谏不纳，去之梁，从孝王游。景帝召拜弘农都尉，乘不乐郡吏，以病去。复游梁，孝王薨，归淮阴。乘子皋事梁共王，遇谗，诣关自诉武帝。帝得之，大喜，诏使赋平乐馆，善之，拜为郎。

司马相如，字长卿，蜀郡成都人。好书，学击剑，以资为郎，事孝□□□□□□□□因病免。客游梁，孝王命与邹阳、枚乘、□是之徒同舍，数岁，乃著《子虚赋》。孝王卒，复归蜀。

唐

高适，字达夫，渤海人。举有道科授封丘尉，累迁至谏议大夫。五十三岁始学诗，诗即工与李白杜甫，登眺吹台，赋《古大梁行》。至今，吹台有三贤祠。

宋

贾昌龄，字延年，其先镇备人。以仕迁开封，祖琰枢密直学士，赠尚书左丞，父汾仕终殿中。丞龄□孤师事翰林，李宗谔登进士为浮梁尉，俗有服毒草相斗死而诬告者，龄立雪其冤，累迁职方员外，知卫州。往刺卫州者相继死，或谓昌龄改署则吉。昌龄曰：死生天乎？人何能为之。任竟无恙。拜太常卿。直昭文馆，镇南海，卒于官。

冯元，字道宗，始平人。三世事岭南为日官，随刘鋹归宋，因家开封。举进士，累官国子直讲。真宗召讲《周易》泰卦，元推君臣交感之义，上大悦。仕终户部侍郎，卒赠尚书，谥章靖。

王旦，字子明，大名人。父祐，太平兴国初知开封府，因家于汴。旦举进士，官至右仆射，迁至太尉。天下称为贤相。卒谥文正。

钱惟演，字希圣，杭州人。父吴越王俶归宋，赐第开封，因家焉。惟演有俊才，累官兵部尚书枢密使，改崇信军节度使。卒于官，赠侍中，谥文僖。从弟晃进士及第，累官右谏议大夫，易累官翰林院学士。

刘安世，字器之，魏人。初举进士，不就选。从学于司马君实，已而调洺州司法，累迁枢密都承旨。数有论谏，章惇恶之，屡贬新州别驾，安置英州。同文馆狱起，蔡京乞诛安世，谗虽不行，犹徙梅州。惇等又使人将要杀之，其人毙得免。及京相，连七谪，至峡州羁管。稍复承议郎，卜居宋都，卒葬祥符。后金人发其冢，貌如生，相惊曰：异人也！为之盖棺乃去。

元

李铎，字振文，其先广平人，徙居大梁。始以吏才，累官至南康路总管，所至有能声，卒葬开封县章田村。

羊仁，庐州庐江人。至正初，北兵南下，仁家为所掠，父被杀，母及兄弟皆散去。仁七岁鬻为汴人李子安奴，力作二十余年，子安怜之，纵为良民。踪迹得母于颍州，兄于睢州，弟于邯郸，皆为役，尚无恙。乃遍恳亲故，贷钞百锭，历诣诸所求赎之。经营百计，更六十年，乃得。遂大小一十餘口复聚居为良，孝友甚笃，乡里嗟之大德。二十年旌其家。

明

薛瑄，字德温，山西河津人。父贞永乐中除鄱陵教谕，瑄随父任，遂补弟子员，举庚子河南乡试第一。明年登进士，授监察御史。手录《性理大全》，潜心诵读，深有所得，著《读书录》。正统初，转山东提学僉事，迁大理少卿。以平狱忤王振，免归。己巳起为大理寺丞，寻升南京大理卿。天顺改元，召为礼部右侍郎兼翰林院学士，入内阁知制诰，复迁左侍郎。时石亨等乱政，瑄乃乞休归。卒赠礼部尚书，谥文清。隆庆中，诏从祀孔子庙。

曹烨，字石帆，徽州人。从父商于汴，幼颖悟，未冠能属文，览典籍悉如故。年十八补郡弟子员，弱冠登贤书。越四载，成进士。以部曹典蜀试，脂车就道，凡远山、长流、古枫、断碑咸点缀成章，载所梓星轺书中，典丽可法，所取七十人，多知名士。

毕今梁，西洋人，有异术，兼通历数。崇祯初至祥符，荐绅先生多从之游，上官扁其门曰：西国鸿儒。

国朝

胡士梅，字尔调，辽之金州人。初令祥符，继任兴屯道，多德政，后备兵洮岷，丁艰寓汴，筑葵园，日坐吟啸。著有《屯餘篇》梓于世，士人多从之游。

盛治，字霖襄，江南扬州人。己丑进士，任河南管河道，以疾退，家于汴。喜以文诲人，士多有进而受业者。

方伎

方伎小道，致远者奚取乎？然而一艺不成，亦君子所耻也。吾汴素号名区，医卜之奇、书绘之工或可以济当时，或可以贻后世，盖往往而有焉，进而收之，岂仅作牛溲马渤观哉？作方伎志。

唐

韩干，梁人，善写马及山水人物鸟兽。王维见之赏鉴，遂荐奖，官至大府寺丞。好古家尚收藏其马。

五代

赵修己，浚仪人。少精天文推步之学。晋天福中，滑州节制李守贞表为司户参将，留门下。每从守贞出征，占候军事多中。及守贞镇蒲津，阴怀异志，修己谕以祸福，不听，遂辞疾归。明年守贞果叛，而修己不与其难。周世祖镇邺，奏参军谋。会隐帝诛杨邠等，将害世祖，修己知天命所在，劝世祖南渡自诉，世祖然之。及即位，改鸿胪卿，迁天司监。

宋

楚衍，开封人，少通四声字母，又于《九章》《缉古》《缀术》《海岛》诸算经尤得其妙。明相法及《聿斯经》，善推步、阴阳、星历之数，间语休咎无不中。仕至天司监，有女亦善算术。

许希，开封人。以医为业，补翰林医学。景祐元年，仁宗不豫，众医莫能治。冀国太长公主荐希，希诊曰：针心下包络之间，可亟愈。左右争以为不可，诸黄门祈以身试，试之，无所害。遂以针进，而帝愈。命为翰林医官，赐赉甚厚，官至殿中省尚药奉御。

王诜，字晋卿，尚英宗女蜀国公主。为利州防御使。虽在戚里，而其被服礼义，学问诗书，常与寒士角。平居攘去膏粱，黜远声色，而从事于书画，作宝绘堂于私第之东，以蓄其所有。东坡为之记，东轩亦赠诗云：锦囊犀轴堆象床，义竿连幅翻云光。手披横素风飞扬，卷舒终日未用忙。游意淡泊心清凉，属目俊丽神激昂。其所画山水学李成，皴法以金碌为之，似古。今《观音宝陀山状小景》，亦墨作平远，皆李成法也，故东坡谓“晋卿得破墨三昧”。有《烟江叠嶂图》《房相宿因图》及《山阴陈迹》《雪溪乘兴》《四明狂客》《西塞风雨图》《著色山水》等图传于世。

杨泽，字润夫，祥符人。始以明经进士业，善文词，金季科举废，隐于野，潜心医术，后仕元。辞职。年七十六而卒，追赠荣禄大夫司徒柱国梁公，谥曰懿。

杨元直，字大方，泽之仲子。继父医业，以著书历仕世祖、成、英、泰定数朝，

官至明文馆大学士兼大医院事掌医卿，卒赠光禄大夫、河南北行中书省平章柱国，追封梁国公，谥忠穆。

明

周溥，字文渊。其先会稽人，国初徙居汴中。溥颖敏嗜学，及长，患羸疾，自度弗起。遇南郡高子明，疗之而愈。溥遂从之受脉书及诸秘方，且录且读。三年尽其术，疗病无弗愈。于是四方迎谒者，络绎不绝。人有赠贻，粟帛之外，宝玩奇货悉谢弗受。宣德中，以耆宿诏给冠带，年八十七而卒。

李信，字用诚，祥符人。其先世业小儿医，赵宋时有医皇子胫疡者，予之官不受，赐以金钟，悬诸门，故号金钟李氏。信坦易诚恇，有迎之者，无远近、风雨、暝晦，皆身亲历之，一视则生死立决当。天顺成化间名动诸郡，太守括苍金文雅重之，尝赋安幼堂诗以赠。子敬亦精其业。

史仕，字君显，周府良医正。九世祖全，业幼科医，居洛中。永乐初，任周府良医，因徙汴。自全至仕凡十代，皆以医显名仕，精于《素问》《难经》诸书，治病能察虚实，依病制方，无弗取验。德清蔡中丞抚河南，时子方二岁，病痹发热，诸医皆用芩连，热愈甚。或荐仕往，仕疹脉法应补，蔡初难之，仕力主其方，阴川附子佐参芪，一服即安寝思食，热咸太平，又数服而愈。蔡神其术，携至京，捐贲为授周府良医正。其他疗病全活者不能具悉。寿至八十七乃终。

张路，祥符人，号平山，以号行于世。少聪慧，见吴道子、戴文进所画人物、山水最钟爱之，时加临摹，肖其神，笔法苍劲，以画成名。入贲为太学生，而不喜衣冠，任质自放，缙绅先生皆乐与之游。路虽以画名天下，而恬退无所营，终路之世，门巷萧然。

张似山，平山裔也。性嗜画，类乃祖风，绘山水里人尤珍之。

张纪山，图花卉羽虫重于世人。相传曰：前有平山后有纪山。教子士儒魁于乡，为汴名硕。

郑镒，字尚宜。业医，疗病多神异，问奇探秘。年逾七，著述不辍，有《续医说》《医书百朋》《杏花春晓堂方》《方法考》诸书行于世。子名河，号星源，亦以国手名。嵩渚、猷吉、川甫、中川诸先生悉传赞之。

郑耀，号继源。业儒性敦孝友，少读书盈屋，酣黄鲁直笔意，晚娴声律，以父河遗教，工于医术，盛梁宋间。教子封成进士，为御史。

李可全，精医，能研紫书，不计利，全活甚多，号神医。

国朝

艾应奎，字文所，祥符人。为周府良医，精脉理制方不胶前人，疗病多奇中，群医咸则之。

左楨，字青岱，其先临清人。居祥符，善绘画图，山水尤工，亦能诗。所著有布衣草，当道大人咸重之。年未强，卒，闻者咸悲悼。

仙释

二氏惑世久矣，学孔孟者辟焉，至欲并其名而黜之，则亦有弗能者。明太祖有云，其佛仙之灵暗助王纲出世之学，亦入世者所不废也。祥邑虽无名山幽涧足以栖寄真人，然而大乘法门上升异品，亦有接踵而起者矣。是安可以泯没哉？作仙释志。

宋

张拱，汴人。举进士不第，卖药宜春门，忽有道士抵其肆，授以枣七枚，食之，自是踰二年瘦矢俱绝，神气明爽，日可行数百里。后游名山不知所终。

郭上灶，不知何许人。天禧中，以佣淪^①汤滌器汴州桥茶肆中，一日遇吕岩，随去。天圣末如磁州，谒赵长官曰：大数垂尽，愿施一小棺。乞于棺首穿一穴，插通节竹于穴中以通气，明日汲水洗身，卧槐下遂绝。赵异之，依其言葬于河岸，是秋水涨，赵往视之，获棺无尸。

张九哥，庆历中，居汴京，虽盛冬单衣流汗浹面。燕王奇之，尝召见与之酒。岁馀见王曰：将远游，故来别。有小技欲以说王，乃索黄罗叠剪为蜂蝶，跋随剪飞去，莫知其数。少顷呼之，蜂蝶皆来，复为罗。王曰：吾寿几何？曰：与开宝寺浮图齐。后浮图灾，王亦薨。

侯先生，不知何许人。庆历间卖药京师，年四十馀，无鬓眉，瘤赘隐起遍肌体。常半醉，夜与丐者同处。有马元者盛夏随之出闾阖门，浴池中元因就视乃一虾蟆，元遽引退浴出，着衣。元乃前揖之，侯笑曰：子适见我乎，乃召元饮酒肆中，出药一粒，曰：服之，令子寿百岁。此后不复见。

文通慧，姓张氏，名文，汴人。□衣白云寺师，令掌厕盥盆。有市鲜者沃于盆，文偶击之，仆地死。文惧，奔华州总持寺，久之为长老。忽曰：三十年前一段公案，今日当了。众问其故。曰：日午当自知之。遂趺坐以待。时张浚统兵至关，一卒持弓矢至，瞠目视文，将射之。文笑曰：老僧候久矣。卒曰：一见即欲相害，不知何仇？文语以故。卒悟曰：冤冤相报何时了，劫劫相缠岂偶然？不如与师俱解释，如今立地往西天。视之已立化矣。文通慧即索笔书偈云：三十三年飘荡，做了几番模样，谁知今日相逢，却是前生魔障。书毕泊然而化。

刘从善，别号浩然子，西洛人。幼明敏雅，好玄学。大中祥符中，师王太和于京师建隆观，五年试业为道士。天圣初以乾元节赐紫，二年六月承旨充景灵宫侍宸。三年八月降旨选精明经教、勤慎焚修之士，从善首与选，赐正一法服、冠履、剑佩。上

^①煮。

谕以先帝忌辰，令神御前咒食持诵，乃继辑《三洞经偈颂》，以荐仙驾。寻进《咒食文》，上嘉之，赐号“全素大师”，仍以其文颁诸宫观而咒食之文自从善始。至和二年乙未正月，仁宗不豫，召从善于大庆殿设醮，命执政代拜。至夜，伏奏章，帝忽瞑目，已数刻，中外惊警。而从善良久方起，曰：章已达上，帝有敕令圣回矣。俄而，帝苏，圣体遂康。从善累迁右街副录，服气炼形益勤。后至熙宁三年七月二十八日，沐浴而化，年八十有一。后有客见从善白马入蜀，托寄声其禹子，盖尸解云。

志言，本姓许氏。自寿春来居东京景德寺，为人卜休咎，书纸挥翰甚疾，字体道劲，初不可晓，后多验。有具斋荐绘者，则并食之，临流而吐，化小鲜，群泳而去。海客遇风且没，见僧操絙引舶而济，客至都下，志言谓客曰：非我汝奈何？客犹记其貌，真引舟者也。后卒，仁宗以真身塑像置寺中，榜曰显化禅师。

明

张三丰，辽东人，或云宝鸡人。洪武初，寓汴延庆观。时大理卿王宇为儿时，三丰过其里而异之，曰：此儿他日必贵显，后果如其言。天顺二年羽化于成都鹤鸣山，诏封通微显化真人。

胜安，号古峰，俗姓周。幼礼弥陀寺，戒律精严，道行纯洁。尝开讲大乘诸经五十余会，修葺招提四十余所。永乐中移居祐国寺，一时缁黄之士从者云集。后以疾而逝，停龕三日，飞烟环绕，阁维之得舍利，凝聚五色，精□如珠，观者异之。

许氏子，居宣平坊，灵丧冢宰赞同宗也，逸其名，性好饮赌，身多癩，尽乞于市，夜卧东岳庙廊庑。一夕见二鬼扫地，云八仙来拜。俄而仙至，如画中像，岳神盛饰出迎。许氏子牵湘子衣，湘子与书一卷。后归家，昼出夜入，拥呼如王者像。父怪之，且恐祸及，用醇酒醉之，以石击死，殓而葬。棺出门渐轻，开视之，止存敝帚戴毡帽覆白衣，尸无存矣。

云居，城北五里天王寺游僧也，周定王出猎，僧坐不起，王怒以鞭撻其面，火出，王异之，归设席，差官往请，僧云少候，洗面即行。顷谓官曰：为我谢王，我已赴席来矣。官不信，僧袖出一蒸食为验，官报王，王视之，果席中物，再往召，莫知所向，因捐金广其所居梵宇。

祥符县志卷之五 终